

Apocalipsis

Llëbo ëre pina Jesucristorë Juan kong, shji yo ñno wleni

Kjibokwo ëre sorë

Domer shäng kjlara ko Juan. Dënashko ga e Jesús oppingga. Jesús wolono, ga woshrara Sbörë iröng obi irgo ga Juan beno shäng Sbö tjlökwö laga Jesús äska wleniyo shara.

Eshko dbaryo ga Juan iaraba beno shäng dlung tjrëko ko Patmos lishko, ba shdungglo, Jesús roy pjlu lara kjishko. Pjlara ga Jesucristo weno ba kong. Eshko ga llëbo pina ba kong, shji yo ñno wleni, ga ichara ba të, llëbo li miyde nopga uunkongdë wlo.

Bäm go ga ichara kjibokwo të Jesús tjlökwö kjragaga kjrिंगgwo kjäk (7) tjeng kjok shto oblë oblë Asia kjokyo li kong. (Eeri ga kjok eshko li ko Turquía.)

E irgo ga llëbo wen llono li pina ba kong. Nopga owa li shdüya Sbörë sorë li pina ba kong. Ä ëngkwë Sbö nopga tjok sorë li pina ba kong. E zäya Jesúsde sorë li pina ba kong. Llono ga nopga uunkong ber löng sorë li pina ba kong bakoe.

Llëbo ñna Juandë kës ëre tara beno Jesús tjlökwö kjragaga kong.

¹ Llëbo ëre pina Sbörë Jesucristo kong, pñya ba parkagaga kong wlo, llëbo wen döro li miyde lok wlo. Eni ga tja Juan kong ga ba parkaga kjok dogo so ichara Jesucristorë ter shrono shäng bor

kong, llëbo ëre pïya bor kong wlo. ² Llëbo ïnor li tër uunkong bomi kong, Sbö tjlökwo roy lara Jesucristorë bor kong li tër bomi kong bako, ber ba miydoklo wlo. ³ Ëye kjibokwo ëre lë oblë kong ga ber wopjluë. Ëye tjlökwo ëre kuk, ga kole ga ber wopjlu bako, dbar lër shäng li dörö kjïshko.

⁴⁻⁵ Kjibokwo ëre taga tja Juandë.

Jesús tjlökwo kjpgagaga kjringgwo kjäk (7) tjeng kjok shto oblë oblë Asia kjokyo, kjibokwo ëre ichër jek bomi kong.

Rokër Sök Ìyado li* kong, sëyaga doglo kjäk (7) tjeng ba pjlü sökklo jong li bokshto li† kong, Jesucristo kong ga ba wopjlu li kjïshko ga pjây kjimte lok ara, pjây ie ber löng wlëp bakoe. Jesucristo, e Sbö tjlökwo kura li laga jlökoyo, woshrara bäm go li e, pjlupga löng kjok ëre kjing go ichaga li e bakoe. Shji woyde ara, owa pjäng bi go li löna beno dret, ba srëng kwona li go, ⁶ ga shji iara beno löng syöshtagaga parkë löng Sbö, ba Data, borwa pjluyo li kong. E kjïshko ga Cristo iëy ber kësbang, tjwlö ara, dbo ara ïyado wlo. Ber eni.

⁷ Tja kuzïa. Llono ga Cristo ter pjäng sho roshko,
 ïga uunkongdë,
 ba shorkegaga löng dënashko li omïk bakoe.

Eshko ga tjëyoga löng kës li ber löng woydë ara ba kjïshko.
 Ber eni.

* **1:4-5** Sök Ìyado le li, e Data Sbö loklo. † **1:4-5** Sëyaga doglo kjäk (7) le li, e Sbö Sëya dbo oblë oblë li loklo.

⁸ Tjlapga Sbö tjlë ga «Tja so tjlökwo toklo ko *Alfa*† kjoyo, tja so tjlökwo toklo ko *Omega*§ kjoyo bakoe. Llëye llëm obishko ga tja sök tjän. Llëbo uunkong pjítong dret ga tja sök obi. Sök İyado li tja. Llëye shäryër woydë li shäryër ga pjlúe» le.

Domer weno shäng kjlara, so no to ter kjok dogo dwayo li kjoyoe

⁹ Tja Juan, tja bomi kjlara Jesús tjlökwo kjruga. Shji mär bi pjluyo Jesús go kjışhko ga shji shdun-goba, gueniyo kuy kjange. Sbö tjlökwo roy lara Jesúsdë bor kong li lër shäng oba kong kjışhko ga tja icharaba beno sök dlung tjrëko ko Patmos lishko.

¹⁰ Pjlara ga Tjlapga Jesús dbaryo* ga tja go Sbö Sëya jlökoyo. Eshko ga ybö kuror bor irgo pjlara dbo ara, pjluk wli bakworoy wleni. ¹¹ Tjlë bor kong ga «Llëye İp li tos ber pjang kjibokwo go. E irgo ga ichos jek Jesús tjlökwo kjrágaga kjrínggwo kjäk (7) tjeng kjok shto oblë oblë Asia kjokyo li kong. Ichos jek Éfeso kjokyo, Esmirna kjokyo, Pérgamo kjokyo, Tiatira kjokyo, Sardis kjokyo, Filadelfia kjokyo, Laodicea kjokyo bakoe» le.

¹² Eshko ga tja bojongö İn iröng, ëye ybö kuror tjlë li ë miydër wlo. Eshko ga İn ga iök shjiy bapkwö shäryak dbur sho shöylör go tjeng kjwo kjäk (7), ¹³ tjrëko shäng kjlara so no to ter kjok dogo dwayo li kjoyo, doyono shäng shwong kur may äär ba kju kjing go, dop pjrikklo shäryak dbur sho shöylör go

† **1:8** Grecia so tjlökwo go ga tjlökwo toklo ko Alfa, e ba bäm İyo, tjlökwo toklo ko A wleni. § **1:8** Grecia so tjlökwo go ga tjlökwo toklo ko Omega, e ba pjirshko, tjlökwo toklo ko Z wleni. * **1:10** Tjlapga Jesús Dbaryo le li, e dbar sondëshko loklo, e woshrara Sbörë e dbaryo kjışhko.

pjang ba pjlú kjing go. ¹⁴ Ba kägä, ba käkzong, e
 kjwo pjlublún so pjäng sho kjoyoe. Ba bok roy
 so iök lok ri ri kjoyoe. ¹⁵ Ba dre so dröng sho so
 klung sho kjoyo li iak jong iök pjë jong ri ri roshko
 li kjoyoe. Ba ybö dbo ara, di kës pjlublunyo dik.
¹⁶ Orkwo këlëkong dbala tjeng kjwo kjäk (7). Dröng
 tur jong ba kjak roy kjwangna, kowo stek kar kar.
 Ba bokkwo kãã lletlet, dlo wleni.

¹⁷ Īn jek drëng ga tja jek rish buk ba dre zlong,
 shji wolono buk wleni. Gueniyo eshko ga tja
 porwara ba orkwo këlëkong go, ga tjlë bor kong
 ga «Llëye bangkjrëp llëme. Llëye llëm obishko ga
 tja sök tjän. Llëbo uunkong pjitong dret ga tja sök
 obi. ¹⁸ Sök Īyado li tja. Tja wolono, gueniyo tja sök
 së Īyado wlo. Shinmoga shtoyo u bäng bäng dökklo
 tjeng bor wloshko, epga woshrër iröng obi ga pjlúe.

¹⁹ »Llëye ĩnop li tozong. Eni tjok ga llëye shäryë
 li tos, llëye wen tek iröng li tos bakoe. ²⁰ Dbala
 ĩnop tjeng kjwo kjäk (7) bor orkwo këlëkong ëre,
 iök shjiy bapkwo shäryak dbur sho shöylör go
 tjeng kjwo kjäk (7) ëre, e llë loklo lër bop kong.
 Iök shjiy bapkwo kjwo kjäk (7) ëre, e bor tjlökwo
 kjraga kjringsgwo kjäk (7) tjeng kjok shto oblë oblë
 li jyäglö. Dbala kjwo kjäk (7) ëre, e roy sögaga
 kjok dogo so doglo kjäk (7), parkë löng bor tjlökwo
 kjraga kjringsgwo kjäk (7) kong li jyäglö bakoe.

2

*Kjibokwo tak pjang Jesús tjlökwo kjrägaga löng
 Éfeso kjokyo li kong*

¹ »Roy söga kjok dogo so shäng kjlara, bor tjlökwö kfragaga löng Éfeso kjokyo li kong. Kong kjibokwö tos kjwara, söya jek ba kong wlo. Kjibokwö li tos eni:

»“Shäng kjlara, orkwö këlëkong dbala tjeng kjwö kjäk (7), jëk shäng iök shjiy bapkwö shäryak dbur sho shöylör go tjeng kjwö kjäk (7) li tjreko. E tjle bomi kong ga ² Pjäy jëk löng sorë, e miydër. Pjäy parkë bor kong kjang, llëbo weno bomi kong owashko ga kumi kjang bakoe. No kjone kjone tjleño ga “Tja Sbö tjlökwö roy laga Jesús äska” lara eni. Eshko ga tjlinomi yötso, ga miydoromi ga jyö erä. Eshko ga ioromi beno jëk löng bomi tjok ame. ³ Bor kjishko ga llëbo weno bomi kong owa ara, gueniyo kuromi kjang, pjäy wosonkono llëm bakoe.

⁴ ”’Gueniyo bor kong ga pjäy löng llëbo shäryë owa kjrina. Pjäy mär löng bor go kjwlëshko ga pjäy ëng woydono ara kar kare. Gueniyo pjäy opshäryë eni ame. ⁵ Pjäy opshäryono dämärshko sorë li woyotjlizä. Llëbo shäryëmi löng owa li, e owa jlöe lozi, ga rayozä, ga llëbo shäryoromi dämärshko, Sbö tjlökwö kjroromi kjwlëshko li shäryozä eni iröng obi. Shäryëmi eni llëm ga tja jek bomi iök shjiy bapkwö jong li kjë bomi shjiryö. ⁶ Gueniyo llëbo ber pjlu bomi kong, llëbo owa shärye nicolaítagarë löng li iywor shjiktëng, ga pjäy omiywö shjiktëng eni bakoe.

⁷ ”’Ëye kwomgwö tjok ga woyde ga tjlökwö le Sbö Sëyarë bor tjlökwö kfragaga kong li kuya yötso. Sbö kjok bukshko ga kjor jong kjlara, ba bo uoroy ga shji wolon llëme. Ga ëye llëbo owa li

zano ga ichër kjor bo li uë' le.”

Kjibokwo tak pjang Jesús tjlökwo kjrägaga löng Esmirna kjokyo li kong

⁸ »Roy söga shäng kjlara obi, bor tjlökwo kjrägaga löng Esmirna kjokyo li kong. Kong kjibokwo tos kjwara, söya jek ba kong wlo. Kjibokwo li tos eni:

»“Shäng kjlara, llëye llëm obishko ga sök tjän, llëbo uunkong pjitong dret ga sök obi. Era wolono, ga woshrono iröng obi. E tjlë bomi kong ga ⁹ Pjäy shdungoba sorë, e miydër. Pjäy song jlöe. Gueniyo jlökoyo ga pjäy song llëm, pjäy llëbo ara wleni. Pjäy jyöyotke nopgarë sorë li miydër. Epga tjlë ga “Tjawa judíoga” le, miga jyö, epga Ä nopga erä. ¹⁰ Llëbo wen tjwe bomi kong owa li bangkjrëmi llëme. Lër bomi kong ga pjäy kjong kjong ie Äre om go ber löng no shdüzlong uyo roshko, pjäy tjliya wlo, llëbo owa shäryëmi wlo le, ga pjäy shdüya song äär jong dbar sak kjwara (10). Gueniyo tja rayëmi llëm, äär jong pjäy wolono guing. Shäryoromi eni ga pjäy iër ber löng së iyado Sbö tjok.

¹¹ ” ’Ëye kwomgwo tjok ga woyde ga tjlökwo le Sbö Sëyarë bor tjlökwo kjrägaga kong li kuya yötso. Ëye llëbo owa li zano ga nopga wolono tjeng li wolon jek obi wlenishko ga llëye wen ba kong llëme’ le.”

Kjibokwo tak pjang Jesús tjlökwo kjrägaga löng Pérgamo kjokyo li kong

¹² »Roy söga shäng kjlara obi, bor tjlökwo kjrägaga löng Pérgamo kjokyo li kong. Kong kjibokwo

tos kjwara, söya jek ba kong wlo. Kjibokwo li tos eni:

»“Shäng kjlara, dröng tjeng kjwangna, kowo stek kar kar. E tjlē bomi kong ga ¹³ ‘Miydër ga pjäy löng lishko ga nopga pjluyo li Ä erä. Eni ëmdë ga pjäy mär löng bor go ïyado. Dënashko ga domer shäng kjlara eshko ko Antipas. E parkono bor kong pjlúe. E zröraba bomi tjrëkoshko ga tja rayoromi llëme.

¹⁴ ” ‘Gueniyo bor kong ga pjäy löng llëbo shäryë owa. Dënashko ga Balac pina Baländë Israel tjëyoga jyãpgwë ara. Epga ichara öng sho twaraba sböpga jyãglo kong li uë. Epga ichara pë no orkwosmono ba tjok llëm li tjok. Pjäy kjone kjone jëk löng tjlökwo ëre go. ¹⁵ Pjäy kjone kjone jëk löng tjlökwo owa le nicolaítagarë li go bakoe. ¹⁶ E kjishko ga llëbo owa shäryëmi löng li, e owa jlöe lozï, ga rayozïa. Llëm ga tja jek bomi shwoy, ga tja ëngkjwë bomi tjok, dröng tur jong bor kjak roy li go.

¹⁷ ” ‘Ëye kwomgwo tjok ga woyde ga tjlökwo le Sbö Sëyarë bor tjlökwo kjrägaga kong li kuya yötso. Ëye llëbo owa li zano ga kong dli ter kjok dogo dwayo miydëba kjok ëre kjing go llëm wleniyo li* twër ber ba kong. Kong akkwo kjwo pjlublún twër kjwara bako, goshko ko jyã tak pjang tjaglën, miydaga ërë llëm, miyde ba kjräga lirë eröe’ le.”

Kjibokwo tak pjang Jesús tjlökwo kjrägaga löng Tiatira kjokyo li kong

* **2:17** Dli ter kjok dogo dwayo le li, ko maná.

18 »Roy söga shäng kjlara obi, bor tjlökwö kjragaga löng Tiatira kjokyo li kong. Kong kjibokwo tos kjwara, söya jek ba kong wlo. Kjibokwo li tos eni:

»“Sbö Wa, ba bok roy so iök lok ri ri kjoyo, ga ba dre so dröng sho so klung sho kjoyo krung beno shjiy kjoyo bakoe. E tjlä bomi kong ga 19 Pjäy jek löng sorë, e miydër. Pjäy eng woydë ara, pjäy mär bor go, pjäy parkë bor kong pjlu, llëbo wen bomi kong owashko ga kumi kjang bakoe. Miydër ga eerishko ga pjäylöng llëbo pjlu shäryë ara, pjäy mär bor go bäm go li kjinmo bakoe.

20” ’Gueniyo bor kong ga pjäylöng llëbo shäryë owa kjrina. Walë shäng kjlara ko Jezabel. E tjlä ga “Tja Sbö tjlökwö laga” le, gueniyo jyö erä. Tjlokwö le shäng li go ga bor parkagaga jyäpgwe ara. Epga iche pë no orkwosmono ba tjok llëm li tjok. Epga iche öng sho twaraba sböpga jyäglö kong li uë bakoe. Eni ëmdë ga e slomi llëme. 21 Kong dbar tworor kop ara, llëbo owa shärye shäng li, e owa jlöe le wlo, gueniyo raye woydë llëme. 22 E kjishko ga iër ber buk swlo ara, ba bukklo kjing go. Eye pë ba tjok, ga llëbo owa shärye löng li raye llëm ga shdun ara bakoe. 23 Walë li wapga zrör drete. Eshko ga bor tjlokwö kjragaga löng kës li ommiydë ga wotjlük llë li, llëye woyde löng li, e miydër pjlu, ga pjäy kjlara kjlara potjwlën, llëbo shäryoromi li kjishko.

24” ’Gueniyo pjäy kjone kjone jek löng Jezabel tjlokwö li go llëme. Pjäy oppino kjok miydë Ä i miydëba llëm wleniyo lëba li go llëm bakoe.

Pjãya ichër llëbo oblë shãryë llëme. ²⁵ Pjã mär ber löng tjlökwo kjroromi li go erä.

²⁶ ”’Ëye llëbo owa li zano, ga tja kolara äär jong ba dbo go ga kong dbo twër, tjëyoga uunkong iche wlo, ²⁷ dbo twara bor Datarë bor kong sorë ga eni. Ga “epga iche kjang; kole lok llëm ga shdûya ara, klung sbi dloroy pjäs wleni.”† ²⁸ Ga kong dbala ko Dbar Kjoklo li twër ber ba kong bakoe. ²⁹ Ëye kwomgwo tjok ga woyde ga tjlökwo le Sbö Sëyarë bor tjlökwo kfragaga kong li kuya yõtso’ le.”

3

Kjibokwo tak pjang Jesús tjlökwo kfragaga löng Sardis kjokyo li kong

¹ »Roy söga shäng kjlara obi, bor tjlökwo kfragaga löng Sardis kjokyo li kong. Kong kjibokwo tos kjwara, söya jek ba kong wlo. Kjibokwo li tos eni:

»“Shäng kjlara, wloshko tjeng Sbö Sëyaga doglo kjäk (7),* dbala kjwo kjäk (7) bakoe. E tjlë bomi kong ga ‘Pjã jëk löng sorë, e miydër. Pjã löng së lëba, gueniyo pjã wolono löng wleni. ² ¡Pjã wollenzong! Pjã dbo beno sira dö, ga jetoe. E kjïshko ga pjã dbokjrozong. Ìn ga pjã jëk löng pjlo bek bor Sbö bokso llëme. ³ Tjlökwo kuromi, kjroromi li, e woyoshrozï, kolozï iröng obi. Llëbo owa shãryëmi löng li, e owa jlöe lozï, ga rayozïa. Pjã wollen llëm ga tja koshëmi löng llëmshko ga tja jek bomi shwoy, no lü ä wleni.

† **2:27** Salmo 2.9. * **3:1** Sbö Sëyaga doglo kjäk (7)le li, e Sbö Sëya dbo oblë oblë li loklo.

4 » 'Pjāy kjlōbö, bomi shwong shtimirë wliwli wleni llēm obi. Pjāyda omshāryono eni kjīshko ga pjāy iēr ber jēk lōng bor tjok, doyē shwong ko pjlublún go. 5 Ēye llēbo owa li zano ga doyē shwong ko pjlublún go, baīya dik. Ēye ber sōk sē īyado Sbō tjok wlo ga ba ko, e tak pjang Sbō kjibokwoyo li go. Ga ēye llēbo owa li zano ga ba ko lōn kjibokwo li go dwayo llēme. Ba kjīshko ga tja tjlē bor Data, ba parkagaga kjok dogo so kong ga “Kjwe botoya” lēr ba kong lok eni. 6 Ēye kwomgwo tjok ga woyde ga tjlōkwo le Sbō Sēyarē bor tjlōkwo kjrāgaga kong li kuya yōtso' le.”

Kjibokwo tak pjang Jesús tjlōkwo kjrāgaga lōng Filadelfia kjokyo li kong

7 »Roy sōga shāng kjlāra obi, bor tjlōkwo kjrāgaga lōng Filadelfia kjokyo li kong. Kong kjibokwo tos kjwara, sōya jek ba kong wlo. Kjibokwo li tos eni:

»“Shāng kjlāra, e erōe. Tjlōkwo bek laga li e bakoe. Pjlu David u bāng bāng dōkklo tjeng ba wloshko. U bāng bāng dōra ga bāngzaga ērē llēm, u bāng bāng bāngzara ga dōga ērē llēm bakoe. E tjlē bomi kong ga 8 'Pjāy jēk lōng sorē, e miydēr. Īzīa. U bāng bāng dōror jong bomi bokshto, bāngzaga ērē llēme. Miydēr ga pjāy dbo ara llēm, gueniyo bor tjlōkwo koloromi, tja rayoromi llēm bakoe. 9 Pjāy lōng lishko ga nopga lōng kjlōbö, tjlē ga “Tjawa judiōga” le, miga jyō, epga Ā nopga erā. Llono ga epga ichēr kjōk tjok bomi bokshto, ga tjlē lok bomi kong ga “Nopga woyde Jesúsde ara li pjāy” le bomi kong eshko. 10 Dbar tjwe kjwara ga llēbo wen nopga lōng kjok kjwang

jĩkong li kong owa, epga tjĩn wlo. Dēnashko ga tja tjĩno bomi kong ga “Llēbo wen bomi kong owashko ga kuzĩ kjang, tja rayēmi llēme” loror bomi kong eni, ga tjĩkwō li kōloromi. E kjĩshko ga dbar owa li tjweshko ga pjāy dēr yōtso, pjāy dār wlo.

¹¹ ”Tja äär malinge. Llēye tjeng bomi tjok li jnezĩ, bomi potjwlēkklo li dōga ērē bomi shjiryo llēm wlo. ¹² Ēye llēbo owa li zano ga iēr ber shāng Sbō u shwleyo wleni, ga ber shāng eni ĩyado. E go ga bor Sbō ko li tēr, bor Sbō kjokyo ko li tēr, bor ko li tēr bakoe.† Ba kjokyo li, Jerusalén kjokyo tjaglēn li e. E ter kjok dogo dwayo. ¹³ Ēye kwomgwō tjok ga woyde ga tjĩkwō le Sbō Sēyarē bor tjĩkwō kjrāgaga kong li kuya yōtso’ le.”

Kjibokwo tak pjāng Jesús tjĩkwō kjrāgaga lōng Laodicea kjokyo li kong

¹⁴ »Roy sōga shāng kjlara obi, bor tjĩkwō kjrāgaga lōng Laodicea kjokyo li kong. Kong kjibokwo tos kjwara, sōya jek ba kong wlo. Kjibokwo li tos eni:

»“Shāng kjlara, ‘Ber eni’ laga li e. Llēye le li shārye eni ĩyado. Llēye ĩna li le jĩkwōyo. Llēbo shāryara Sbōrē kēs ichaga li e bakoe. E tjĩlē bomi kong ga ¹⁵ ‘Pjāy jēk lōng sorē, e miydēr. Pjāy zengteng anmoyō wleni llēm, pjāy kjlik ara anmoyō wleni llēm bakoe. Woydēr ga pjāy kjlik wleni, llēm ga pjāy zengteng wleni. ¹⁶ Gueniyo pjāy kjlikjli wleni erō kjĩshko ga pjāy tjwēr bor

† **3:12** Sbō ko li tak lok ba go, epga baĩya kjĩshko.

kjak roy dwayo wleni.† 17 Pjãy tjlẽ ga “Tjawa dbur sho ara. Llẽbo wlẽnorwa ara. Llẽye oblẽ woydërwa llẽme” lëmi eni. Gueniyo pjãy song jlõ, pjãy llẽye dret, pjãy kjok ïgõ llëm, pjãy shwong llëm bakoe. ¿Pjãy opkugõ lõng llëmde? 18 E kjĩshko ga lër bomi kong ga dbur sho shõylõr suk pjir beno pjlu wleniyo tjwlẽzĩ bor kong, ber bomi kong wlo, pjãy ber lõng dbur ara jlõkoyo wlo. Shwong ko pjublun tjwlẽzĩ bor kong, ber bomi kong wlo, pjãy doyë e go wlo, pjãy lõng kjlop dret li lõkyo jnemi e go wlo. Ga bokkwo dwloyo tjwlẽzĩ bor kong, ber bomi kong wlo, pjãy kjok ïgõ pjlu wlo.

19 ” Æye woydër li jëk owashko ga wlon, ga poshdun, opyë jëk pjlo bek irõng wlo. Eni ga llẽbo owa shãryëmi lõng li, e owa jlõe lozĩ, ga rayozĩa. 20 Kuzĩa. Tja shãng na bomi u bãng bãng bomi rokë, tja iëmi opzrëk jek bomi tjok wlo. Æye, tja kura, ga u bãng bãng li dõra bor kong ga tja opzrëk jek ber sõk ba tjok, ga tjawa ië ëng tjok.

21 ” Llẽbo owa li zanor, ga tja õõtong sõk bor Data tjok, ba pjlu sõkklo kjing go. Æye llẽbo owa li zano ga kong dbo twër äär ber sõk bor tjok, bor pjlu sõkklo kjing go eni bako wlo. 22 Æye kwomgwo tjok ga woyde ga tjlõkwo le Sbõ Sëyarë bor tjlõkwo kjpgaga kong li kuya yõtso’ le.”»

4

† 3:16 Eshko dbaryo ga di bãng tjeng kjlik ara anmoyõ, ga nopga dwlomnek di kjlik li go. Di bãng tjeng obi zengteng anmoyõ, ga di eniyo li ie lok, ber lõng wopjlu wlo. Gueniyo di bãng tjeng kjlikjli llë, e ba kong ga llëno llëme.

Pjlu sökklo jong kjwara kjok dogo

¹ E irgo ga ñnor jek obi, ga ñn ga u bäng jong oojong kjwara kjok dogo. Ga ybö kuror pjlara pjluk wli bakworoy wleni li tjlëno bor kong obi. Tjlë ga «Pja tëmö. Llëye wen ère irgo li pin bop kong» le. ² Jekdo eshko ga tja go Sbö Sëya jlökoyo. Eshko ga pjlu sökklo ñn jong kjwara kjok dogo, kjing go ëbo sök kjlara. ³ Sök li so akkwo wolësowa ko *jaspe*, *cornalina*, e kjoyoe. Sökklo li sor go, donku pjang pjribri, kãã kësong, akkwo wolësowa ko *esmeralda* kjoyoe. ⁴ Sökklo li sor go, pjlunga sökklo lok sak pjök kjingsho pkëng (24), tjlapga kjok llgwega wleniyo sök kjlara kjlara sökklo li kjing go, doyono sök shwong pjublún go, pjlu dlu ioklo shäryak dbur sho shöylör go jong ba dlu kjing go. ⁵ Sökklo jong roworbëshko li roy dwayo, llgwëng tur jong lletllet llaw pogo, kjrik ri ri le ara bakoe. Sökklo li bokshto ga iök pjë lok ri ri ba bapkwö roy kjwo kjäk (7). Sbö Sëyaga doglo kjäk (7) li* e. ⁶ Ga llëbo ñn buk sökklo li bokshto oblë, so dlung shäryak batlë sho go kjoyo, roigöy wëïëe.

Sökklo li worbo go pjlor kar kar, äya löng së wleniyo tjeng kjlara kjlara. Doglo pkëng (4) li bökkwo lok llaw pogo, bäm lë, iröng lë bakoe. ⁷ Kjlara so dbong kjoyo, kjlara so söglä kjoyo, kjlara bökkwo so no kjoyo, kjlara so döbung dbuk pjang kjoyoe. ⁸ Kjlara kjlara sjägä lok ko tjer (6), ga bökkwo lok llaw pogo, sjägä li dorko bakoe. Shkë dba ga tjlë löng ñyado. Tjlë ga

* **4:5** Sbö Sëyaga doglo kjäk (7) le li, e Sbö Sëya dbo oblë oblë li loklo.

«Tjlapga Sbö, llëye shäryëp woydë li shäryëp ga pjlúe.

Pja eröe. Pja eröe. Pja eröe.

Pja sök ÿyado» le lok eni.

⁹ Sök pjlú sökklö kjing go li sök ÿyado. E poshrëya äya löng së lirë ara, e ie lok ber kësbang, tjwlö ara. Ga tjlä lok ba kong ga «Tjava wopjlú bop tjok ÿyado» le eni. Le lok enishko ga ¹⁰ tjlapgaga kjok llgwega wleniyo doglo sak pjök kjingsho pkëng (24) löng li kjök tok sök li bokshto. Ga poshrëya lok eni wopro ga ba pjlupga dlu ioklo ie ba sökklö li bokshto, ga tjlä lok ga

¹¹ «Borwa Tjlapga, borwa Sbö,

llëbo tjeng kës li shäryaga pjarë,

woydorop eni kjishko.

Ga beno löng së li laga pjarë bakoe.

E kjishko ga pja tjwlö ara,

pja iërwa ber kësbang, tjwlö ara wlo,

pja bangkjrërwa wlo,

dbo ara li ber bop kong wlo bakoe» le lok eni.

5

Öng Wlëp Ushko So Llgwoklë, kjibokwo

¹ Eshko ga ïn ga sök pjlú sökklö kjing go li orkwo këlkong kjibokwo tjeng kjwara, tak pjir kjwo kar kare. Kjibokwo li dira pjir, ga kjarbo smona kjibokwo smokklo go kjwo kjäk (7), roshwing llëm wlo. ² Ga ïn ga Sbö parkaga kjok dogo so shäng kjlara, dbo ara wleniyo. E tjläno dbo go, tjlä ga «¿Ëye tjwlö ara, kjibokwo smokklo iak lok kjibokwo kjarbo go li döya wlo, kjibokwo li roshwïya wlo?» le. ³⁻⁴ Gueniyo ëye tjwlö ara, kjibokwo li

roshwīya, īya wlo dret, ēye sök kjok dogo eniyo llēm, ēye sök kjok ēre kjing go eniyo llēm, ēye sök klung ēre dorko eniyo llēm bakoe. E kjīshko ga tja slar ēēe. ⁵ Gueniyo tjlapgaga kjok llgwega wleniyo kjlara tjlē bor kong ga «Pja slar ame. Judá tjēyo li dbongyo sök kjwe īzong. Kjwe David tjēyo. Llēbo owa li zana pjire. E kjīshko ga kjibokwo smokklo iak lok kjibokwo kjarbo kjwe döya ga pjlú, kjibokwo kjwe roshwīya ga pjlú bakoe» le.

⁶ Eshko ga ĩn ga Öng Wlēp Ushko So Llgwoklē li kojono sök pjlú sökklo lishko, äya löng sē doglo pkēng (4) li, tjlapgaga kjok llgwega wleniyo löng li, e tjrēko. Ga ĩn ga zröraba kjoyoe. Öng li sjö kjwang kjäk (7), bokkwo kjwo kjäk (7), e Sbö Sēyaga doglo kjäk (7),* ichak kjok kjwang jīkong li loklo. ⁷ Eshko ga jek pjlú sökklo li zlong, ga sök pjlú sökklo kjing go li, kjibokwo tjeng ba orkwo kēlēkong li kjrara Öng lirē ey dwayo. ⁸ Kjrarashko ga äya löng sē doglo pkēng (4) li, tjlapgaga kjok llgwega wleniyo doglo sak pjök kjingsho pkēng (24) li, e kjök tono tjeng Öng li boksho. Kjlara kjlara wloshko kjorkwang shāryak jong kjiyo tjok tēy or go wleniyo tjeng kjwara, wloshko di ioklo shāryak dbur sho shōylör go tjeng kjwöbö, roshko llēbo lö pjlēblēe. Llēbo lö pjlēblē li, e Sbö nopga syō li loklo. ⁹⁻¹⁰ Eshko ga tono lok tēkwo tjaglēn, tēkwoyo eni:

«Pja zröraba,

ga bop srēng kwonop li go ga nopga tjwlēnop
Sbö kong.

* **5:6** Sbö Sēyaga doglo kjäk (7) le li, e Sbö Sēya dbo oblē oblē li loklo.

Nopga tjwłēnop li tjēyoga oblē oblē uunkong,
 tjlē tjlōkwo oblē oblē uunkong, kjok shto
 oblē oblē uunkong sopga bakoe.

Nopga li iorop beno lōng syōshtagaga parkē lōng
 Sbō, borwa pjluyo li kong,
 ga ber lōng nopga lōng kjok ěre kjing go li
 ichaga ĩyado wlo.

E kjĩshko ga pja tjwłō ara,
 kjibokwo kjwe kjrēp wlo,
 kjibokwo smokklo iak lok ba kjarbo go li dōp
 wlo bakoe» le.

¹¹ Eshko ga ĩnor jek obi, ga ĩn ga Sbō parkagaga
 kjok dogo so lōng trāk llēm, shtēy ga äär llēm wleni.
 Lōng pjlū sökklo li, äya lōng sē li, tjlapgaga li, e pjlōr
 kalēkong pjribrie. ¹² Ga tjlēno lok dbo ara. Tjlē ga

«ĭÖng zrōraba kjwe tjwłō ara,
 dbo ara li ber ba kong wlo,
 llēbo tjwłō ara tjeng kēs li ber ba kong wlo,
 kjok miydē ara li ber ba kong wlo,
 bangkjrēba wlo,
 iēba ber kēsbang, tjwłō ara wlo,
 poshrēkoba wlo bakoe!» le.

¹³ Eshko ga llēbo tjeng kēs shāryara Sbörē kjok
 dogo, kjok ěre kjing go, klung ěre dorko, dlung
 tjrēko, e tjlēno lok uunkong bakoe. Tjlē ga

«ĭSök pjlū sökklo kjing go kjwe, Öng kjwe,
 e poshrērwa ĩyado,
 bangkjrērwa ĩyado,
 iērwa ber lōng kēs kēs, tjwłō ara ĩyado,
 dbo ara li ber ba kong ĩyado bakoe!» le.

¹⁴ Ga äya löng sē doglo pkēng (4) li tjlē ga «Ber eni» le, ga tjlapgaga li kjök tono, ga sök pjlū sökklo kjing go li, Öng li, e poshrēra lok.

6

Kjibokwo smokklo iak lok kjibokwo kjarbo go

¹ E irgo ga ĩn ga Öng Wlēp Ushko So Llgwoklē li, kjibokwo smokklo iak lok kjibokwo go kjwo kjäk (7) li döra kjwara. Ga kur ga äya löng sē li kjlara tjlēno dbo go, kjrik wleni. Tjlē ga «¡Pja tegö!» le.

² Ga ĩnor jek obi, ga ĩn ga kwomgla sök kjlara kjlo pjlublún. Kjlara sök ba kjing go wloshko sböng tjeng kjwangna. Ga kong pjlū dlu ioklo twaraba kjwara. E irgo ga jek sök kwomgla li kjing go, oba zang wlo le wleni.

³ E irgo ga kjibokwo smokklo döra Öng lirē kjwara obi. Eshko ga kur ga äya löng sē li kjlara obi tjlē ga «¡Pja tegö!» le. ⁴ Eshko ga kwomgla wen sök kjlara obi, kjlo srēzrēn. Kjlara sök ba kjing go. Ga kong dröng twaraba kjwangna kēsbange. Ga kong dbo twaraba llēbo wlēp kjök ēre kjing go li pjiya wlo, nopga ber löng ēng zrök wlo.

⁵ E irgo ga kjibokwo smokklo döra Öng lirē kjwara obi, e tjök ga öötong kjwo mya. Eshko ga kur ga äya löng sē li kjlara obi tjlē ga «¡Pja tegö!» le. Ga ĩnor jek obi, ga ĩn ga kwomgla wen sök kjlara obi, kjlo sī. Kjlara sök ba kjing go, wloshko llēbo tjlīkklo tjeng kjwara. ⁶ Ga kur ga ēbo tjlēno äya löng sē doglo pkēng (4) löng lishko dwayo. Tjlē ga «Nopga iēy ber löng parkē dbar kjwara, dwla

kjrina bayo gök tjung wleni* äska dö, llëm ga dwla kjrina obi bayo gök tjung wleni kjwo mya äska döe. Gueniyo kjoy, kjillgwo bo dyo, e iëy srer llëme» le.

⁷ E irgo ga kjibokwo smokklo döra Öng lirë kjwara obi. Eshko ga kur ga äya löng së li kjlara obi tjlë ga «¡Pja tegö!» le. ⁸ Ga ïnor jek obi, ga ïn ga kwomgla wen sök kjlara obi, kjlo shwëshwë. Kjlara sök ba kjing go ko Shinmo Kägäyo, ga kjlara obi jek shäng ba irgo ko Shinmo Shtoyo. Kjek kjwang jikong li shdöktong beno ktringgwo pkëng (4), ga epga kong dbo twaraba nopga löng kjok kjrina li zrök pjir wlo. Ga zröra dröng go, pjli go, swlo go, äya kjloshko so go bakoe.

⁹ E irgo ga kjibokwo smokklo döra Öng lirë kjwara obi, e tjok ga öötong kjwo shkëng (5). Eshko ga ïn ga shinmoga sëya löng llëbo lö pjläblë sukklo jong eshko li dirko. Epga löng së obishko ga Sbö tjlökwo kjrara lok, ga lara oba kong, ga zröraba e kjishko. ¹⁰ Eshko ga epga tjlëno dbo go. Tjlë ga «Tjlapga, llëye shäryëp woydë li shäryëp ga pjluë. Pja eröe. Pja pjlo bek bakoe. ¿Äär jong llono ga nopga löng kjok kjing go li shdum, tjawa zröra lok li kjishko?» le. ¹¹ Eshko ga kjlara kjlara kong shwong twaraba ko pjublün, ga ëbo tjlë ba kong lok ga «Koshozï sira obi, bomi pjeyoga Sbö parkagaga zrökoba bomipjöy dik wlo li, e zröraba pjir guing» le.

¹² E irgo ga kjibokwo smokklo döra Öng lirë kjwara obi. Eshko ga ïnor jek obi, ga ïn ga yo tjwe pjang kësbang kjrina, dlo kworkwono beno

* **6:6** Gök tjung wleni, e bayo litro kjwara dik.

pjang yēt, shwong ko yēt wleni, mok kworkwono beno pjang srëzrën, srëng wleni, ¹³ dbala lono ter lok kjok ère kjing go, kjor ko *higuera* bakwara pjlukdëshko ga bo lono wleni, ¹⁴ kjok dogo jek jëktëng erä, kjibokwo diroy wleni, ga dlup llë, di tjrëko llë, dlung tjrëko llë, e opkwono lok kjok shto oblë uunkong.

¹⁵ Eshko ga pjlupga löng kjok ère kjing go, nopga tjwlö ara wleniyo, ëngkjwaga kägäyoga, nopga uunkong parkagaga tjwlëk löng pjir wleniyore, de llëmde, e töktong löng uunkong guëng lok ööng roshko, ak kësks tjeng dlup dirko bakoe. ¹⁶ Ga tjlë löng dlup kong, ak kong ga «Pjäy tarzong borwa kjing go. Tjawa jnezī bomi dorko, tjawa wlëya sök pjlü sökklo kjing go lirë llëm wlo, tjawa shdüya Öng lirë ba iir ara li go llëm wlo bakoe. ¹⁷ Borwa shdüzlong dbaryo laraba li öötonge. Ëye omkuk kjang ga äe» le löng eni.

7

Nopga doglo sak dbäw dbäw pjloglo sak dbäw kjingsho sak dbäw dbäw pjloglo sak pkëng kjingsho sak dbäw dbäw pjloglo pkëng (144,000) iak lok llëbo jyäglö go

¹ E irgo ga ïn ga Sbö parkagaga kjok dogo so tjeng doglo pkëng (4), kojono löng kjok pjir worbo kjringswo pkëng (4) lishko, ga pjluk tek eshko dwayo li bänkira, kjok llë, dlung llë, kjor llë, e pjiya llëm wlo. ² Epga kong dbo twaraba, kjok ère pjiya wlo, dlung bakoe. Ga ïn ga Sbö parkaga kjok dogo so kjlara obi tek tjwe shäng dlo wen tëm shwo lëkong dwayo, wloshko Sbö Sök ïyado li

ÿyägŕo. Ga tŕlĕno parkagaga doglo pkĕng (4) lĕng li kong. Tŕlĕ ga ³ «Kjok llĕ, dlung llĕ, kjor llĕ, e pjimi llĕm, äär jong llĕbo ÿyägŕo ioroy Sbĕ parkagaga lĕng kĕs li bokdo go guing» le. ⁴ Eshko ga kur ga Israel tŕyĕyoga iak lok llĕbo ÿyägŕo go li doglo sak dbäw dbäw pjloglo sak dbäw kjingsho sak dbäw dbäw pjloglo sak pkĕng kjingsho sak dbäw dbäw pjloglo pkĕng (144,000).

⁵ Judá tŕyĕyoga iak lok doglo sak dbäw dbäw pjloglo sak kjwara kjingsho sak dbäw dbäw pjloglo pjök (12,000).

Rubén tŕyĕyoga iak lok doglo sak dbäw dbäw pjloglo sak kjwara kjingsho sak dbäw dbäw pjloglo pjök (12,000).

Gad tŕyĕyoga iak lok doglo sak dbäw dbäw pjloglo sak kjwara kjingsho sak dbäw dbäw pjloglo pjök (12,000).

⁶ Aser tŕyĕyoga iak lok doglo sak dbäw dbäw pjloglo sak kjwara kjingsho sak dbäw dbäw pjloglo pjök (12,000).

Neftalí tŕyĕyoga iak lok doglo sak dbäw dbäw pjloglo sak kjwara kjingsho sak dbäw dbäw pjloglo pjök (12,000).

Manasés tŕyĕyoga iak lok doglo sak dbäw dbäw pjloglo sak kjwara kjingsho sak dbäw dbäw pjloglo pjök (12,000).

⁷ Simeón tŕyĕyoga iak lok doglo sak dbäw dbäw pjloglo sak kjwara kjingsho sak dbäw dbäw pjloglo pjök (12,000).

Leví tŕyĕyoga iak lok doglo sak dbäw dbäw pjloglo sak kjwara kjingsho sak dbäw dbäw pjloglo pjök (12,000).

Isacar tjëyoga iak lok doglo sak dbäw dbäw
pjloglo sak kjwara kjingsho sak dbäw dbäw
pjloglo pjök (12,000).

⁸ Zabolón tjëyoga iak lok doglo sak dbäw dbäw
pjloglo sak kjwara kjingsho sak dbäw dbäw
pjloglo pjök (12,000).

José tjëyoga iak lok doglo sak dbäw dbäw pjloglo
sak kjwara kjingsho sak dbäw dbäw pjloglo
pjök (12,000).

Benjamín tjëyoga iak lok doglo sak dbäw dbäw
pjloglo sak kjwara kjingsho sak dbäw dbäw
pjloglo pjök (12,000).

Nopga ara doyono löng shwong ko pjublún

⁹ E irgo ga ĩnor jek obi, ga ĩn eshko pjlu sökkĭo
li, Öng li, e boksho ga nopga löng träk llëm, shtëy
ga äär llëm wleni. Tjëyoga oblë oblë uunkong löng
eshko. Nopga kjok oblë oblë uunkong so löng
eshko. Nopga tjĭlë tjĭlökwo oblë oblë uunkong löng
eshko bakoe. Doyono löng shwong pjublún go,
kjlara kjlara wloshko mek korga. ¹⁰ Ga tjĭlëno dbo
go. Tjĭlë ga

«¡Borwa Sbö, e sök pjlu sökkĭo kjwe kjing go!

¡No döga li kjwe!

¡No döga li Öng kjwe bakoe!» le.

¹¹ Sbö parkagaga kjok dogo so kojono löng pjlu
sökkĭo li, äya löng së doglo pkëng (4) li, tjlapgaga
li, e pjlor kalëkong pjribri li, e kjujono bokdo kjlay
klung go, ga Sbö poshrëra lok. ¹² Tjĭlë ga

«¡Ber eni!

¡Borwa Sbö,

e poshrërwa ĩyado,

e iërwa ber kësbang, tjwlõ ara ÿyado,
 kjok miydë ara'li ber ba kong ÿyado,
 “Tjawa wopjlú ba tjok” lërwa ÿyado,
 dbo ara'li ber ba kong ÿyado bakoe!

¡Ber eni!» le.

¹³ Eshko ga tjlapgaga löng'li kjlara tjlē bor kong
 ga «¿Löng shwong ko pjlublún kjwe è, kjone so, e
 miydëpde?»

¹⁴ «Tjlapga, kjwepga è miydër llëme» lër ba kong.

Kuya ga tjlē bor kong ga «Kjwepga to jek löng
 song jlõ, llëbo weno owa kësbang dbaryo, gueniyo
 ba shwong, e kwoshkwara Öng kjwe srëng'li go
 beno pjlublúne. ¹⁵ E kjīshko ga löng Sbõ pjlú
 sökklo kjwe bokshto, ga beno löng parkë ba u roy
 shkë dbae. Ga kjwepga daga beno Sbörë om go.
¹⁶ Beno löng pjli kuk ame, wodogro ame, suya
 dlorë ame, barwe kjok kjlikdë ame bakoe. ¹⁷ Öng
 sök pjlú sökklo jong kjweshko go kjwe ber ba daga,
 kjwepga söya äär di shji ie ber löng së jlökoyo
 wleniyo buk'lishko. Ga ba boryo krõya Sbörë, ber
 löng slar ame wlo» le.

8

Llëbo lõ pjlëblë bapkwõ

¹ E irgo ga kjibokwo smokklo dõra Öng lirë
 kjwara obi, e tjok ga öötong kjwo kjäk (7). Eshko
 ga kjok dogo beno kjing wop tjoke.

² E irgo ga ïn ga Sbõ parkagaga kjok dogo so
 doglo kjäk (7) löng Sbõ bokshto'li kong wli twaraba
 kjwara kjwarae. ³ Eshko ga Sbõ parkaga kjok
 dogo so tek shäng kjlara obi, wloshko llëbo lõ

pjlëblë bapkwō shäryak dbur sho shöylör go, ga öötong shäng llëbo lõ pjlëblë sukklo shäryak dbur sho shöylör go jong li zlong. Eshko ga kong llëbo lõ pjlëblë twaraba ara, suya Sbö nopga syö li tjok, llëbo lõ pjlëblë sukklo jong pjlū sökklo boksho li kjing go wlo. ⁴Ga llëbo lõ pjlëblë li yö jem pjang Sbö parkaga li orkwō dwayo Sbö boksho, Sbö nopga syö li tjok.

⁵Eshko ga iök sëya kjrara Sbö parkaga lirë kjwöbö, llëbo lõ pjlëblë sukklo li dwayo, ga iara llëbo bapkwō li roy, beno tjunge. E irgo ga iök sëya tjeng ba bapkwō roy li dbura jer kjok ère kjing go. Eshko ga kjrik ri ri le ara, ilgwëleng tur jong lletlet llaw pogo, yo iano bakoe.

Wli

⁶E irgo ga Sbö parkagaga doglo kjäk (7) li poshäryono löng pjir, ba wli li bakwë wlo.

⁷Sbö parkaga bäm li, ba wli bakwara, ga iök lono ter kjok ère kjing go, di zeng kjwolong tjok, srëng tjok bakoe. Ga kjok kjwang jïkong li shdöktong beno kjrïnggwo mya, ga kjok kjrïna li sura pjir, kjor llë, kjlo sho llë tjeng eshko li tjok.

⁸E irgo ga Sbö parkaga kjlara obi, ba wli bakwara, ga llëbo so dlup kësbang pjë jong ri ri kjoyo, e dburaba jer dlung roshko. Ga dlung kjwang jïkong li shdöktong beno kjrïnggwo mya, ga dlung kjrïna li kworkwono beno srëng eröe. ⁹Ga llëbo tjeng së ba roy li kjëtong dret, kjoyong jëk tjeng ba kjing go li pjitong dret bakoe.

¹⁰E irgo ga Sbö parkaga kjlara obi, ba wli bakwara, e tjok ga öötong pjloglo mya. Eshko ga di llë,

di bäng llë, e shdöktong beno kjringsgwo mya, ga dbala lono kjwara kësbang, iök ri ri wleni, di kjrina li kjing go. ¹¹ Dbala li ko Këä, ga di kjrina li iara beno tjeng këä. Di sreno li kjishko ga nopga wolono arae.

¹² E irgo ga Sbö parkaga kjlara obi, ba wli bakwara, ga dlo kãã shdöktong beno kjringsgwo mya, ga kjrina li kworkwono beno yët, mok kãã shdöktong beno kjringsgwo mya, ga kjrina li kworkwono beno yët, dbala kãã shdöktong beno kjringsgwo mya, ga kjrina li kworkwono beno yët bakoe. E kjishko ga dba li shdöktong beno kjringsgwo mya, ga dbar kjwobi go ga kjrina li beno kjok ro yët, shkë li shdöktong beno kjringsgwo mya bako, ga shkër kjwobi go ga kjrina li beno kjok ro yët bakoe.

¹³ Eshko ga ñnor jek obi, ga ñn ga döbung kuror dbuk pjang kjwara kjok dogo, tjlëno pjang dbo go. Tjlë ga «¡Pjây nopga löng kjok kjing go, Sbö parkagaga kjok dogo so doglo mya obi löng ba wli bakwë wlo! ¡E kjishko ga pjây song jlö, pjây song jlö, pjây song jlöe!» le.

9

¹ E irgo ga Sbö parkaga kjlara obi, ba wli bakwara, e tjok ga öötong pjloglo shkëng (5). Eshko ga ñn ga dbala lono ter kjwara kjok dogo dwayo, kjok ëre kjing go. Dbala li kong u bäng bäng dökklo twaraba kjwara, pjläbgwo jong rong anmoyö li dökklo. ² Ga pjläbgwo li kop dörashko ga yö tëm tur jong ba roy dwayo, llëbo sukklo kësbang anmoyö wleni. ³ Eshko ga yö jem pjang li roshko dwayo sekwa ter tur jong träk llëm, shdöktong kjok

kjwang jīkong, ga kong dbo twaraba nopga ue wlo, no ue dyērē wleni. ⁴ Gueniyo ichara kjlo sho llē, kjor korga llē, llēbo kēsōng llē, e uē llēme. Ichara nopga Sbō jyāglo lok ba bokdo go llēm wleniyo li uē erōe. ⁵ Gueniyo ichara beno lōng nopga li zrōk llēm, beno lōng ba shdung ara, äär jong moglo shkēng (5). Ue lokshko ga kuya ga uara dyērē wleni. ⁶ Eshko dbaryo ga nopga lōng li wolon woydē, gueniyo wolon llēme. Wolon woydē ara ēmdē ga wolon ga äe.

⁷ Sekwa lēr li, e so kwomgla doyak pjir, jongya ēngkjwē wlo li kjoyoe. Ba kā kjing go llēbo pjang so pjlupga dlu ioklo shāryak dbur sho shōylōr go li kjoyo, ba bokkwo so no bokkwo kjoyo, ⁸ ba kākzong so walē kākzong kjoyo, ba kowo so dbong kowo kjoyo bakoe. ⁹ Ba worbu wlikoklo so worbu wlikoklo shāryak drōng sho go kjoyo, ba sjāgā, e pjluk so jēkklo ara dopshira kwomglarē jēk lōng ēngkjwē wlo li kjoyo, ¹⁰ ba pjlak, e dbo go jong swlet, so dyē shju kjoyo, ga ba pjlak li go ga nopga shduna ara, äär jong moglo shkēng (5). ¹¹ Sekwa li pjluyo sök kjlara. Hebreo tjlōkwo go ko Abadón. Grecia so tjlōkwo go ko Apolión.* E Ä parkaga, parkē shäng pjlēbgwo jong rong anmoyō li daga.

¹² Llēbo owa anmoyō bām li jek tjän. Gueniyo beno kjring pjök obi.

¹³ E irgo ga Sbō parkaga kjlara obi, ba wli bakwara. Llēbo lō pjlēblē sukklō shāryak dbur sho shōylōr go jong Sbō bokshto li goshko sjō iak lok kjwang pkēng (4). Eshko ga ybō kuror pjlara sjō

* **9:11** Hebreo tjlōkwo Abadón, Grecia so tjlōkwo Apolión, e no pjiga loklo.

lok li go dwayo. ¹⁴ Tjlë parkaga wli bakwaga li kong ga «Sbö parkagaga kjok dogo so tjeng doglo pkëng (4), pjrik löng di kësbang ko Éufrates pjangshko li, e döba» le. ¹⁵ Sbö parkagaga tjeng doglo pkëng (4) li, e iak beno pjrik löng eshko, ba dloyo, dbaryo, mokyö, luyo li öötong guing, nopga zrök ara eshko wlo. Ga nopga löng kjok ère kjing go li shdöktong beno kjringgwo mya. Ga parkagaga tjeng doglo pkëng (4) li döktong, ga nopga kjrina li zröra lok drete.

¹⁶ Eshko ga ëngkjwagaga jëk löng kwomgla söga ara. Kur ga doglo sak dbäw dbäw pjloglo sak dbäw dbäw pjloglo sak dbäw dbäw pjloglo sak dbäw dbäw pjloglo pjök (200,000,000). ¹⁷ Kwomgla, ba söga, e ñor, shji yoïno wleni li, ga so eni. Ba worbu wlikoklo kjwo srëzrën, ding ding, shöylör bakoe. Kwomgla kägä li so dbong kägä kjoyoe. Iök tur jong ba kjak roy dwayo, yö tjok, akkwo ko *azufre* tjok bakoe. ¹⁸ Ga nopga löng kjok ère kjing go li shdöktong beno kjringgwo mya. Ga kjrina li wolono dret, llëbo tur ba kjak roy ère kjïshko. ¹⁹ Kwomgla li dbo ara tjeng ba kjakshko, ba pjlakshko bakoe. Ba pjlak li kägä tjok, so dgur kjoyo, ga nopga shduna lok ara e go.

²⁰ Nopga zröra llëbo owa lirë llëm, beno löng së li, llëbo owa shärye löng li rayara lok llëm, beno löng Ä sëyaga poshrëk, llëbo jyäglo oblë oblë li poshrëk bakoe. Llëbo jyäglo li shäryak dbur sho shöylör go, dbur sho pjublún go, dröng sho so klung sho kjoyo go, ak go, kjorkwang go bako, gueniyo kjok ïga lok llëm, kjok kuga lok llëm, jëk llëm bakoe. ²¹ Enido ga nopga li beno löng llëbo owa shäryë oblë oblë,

oba zröya, oba ie ybi go, pë no orkwosmono ba tjok llëm li tjok, lürkë bakoe. Llëbo owa shäryara kës ëre, e rayara lok llëme.

10

Sbö parkaga kjok dogo so, wloshko kjibokwo chirawa

¹ E irgo ga ñn ga Sbö parkaga kjok dogo so dbo ara wleniyo ter pjang kjlara obi kjok dogo dwayo, doyono pjäng sho go wleni, donku pjang ba dlu kjing bakoe. Ba bokkwo so dlo kjoyo, ba dre so iök kjoyo. ² Wloshko tjeng kjibokwo kjwara chirawa, roshwing pjir ba orkwo kjing go. Ba dre këëkong iara dlung kjing, ga mülëkong iara klung kjing. ³ Eshko ga öö le dbo go, dbong kjluno wleni. Lara pjirshko ga kjrik kjwang kjäk (7) li dloktong, ri ri le kjwangnashko kjwangnashko. ⁴ Tjlökwo lara kjrik kjwang kjäk (7) lirë tër wlo loror, gueniyo kur ga ybö ter kjok dogo dwayo pjlara, tjlä bor kong ga «Jnes ber tjeng bop pjlushko. Tëy llëme» le.

⁵ Eshko ga Sbö parkaga kojono shäng dlung kjing, klung kjing li, orkwo këëkong poyono jem kjok dogo, ⁶⁻⁷ ga tjläno jlökoyo. Tjlä ga «Jlëye koshëy ame! Lëye shäryë wlo li, e laga Sbörë, ga lara ba tjläkwo lagaga kong dënnashko. Maling ga Sbö parkaga kjok dogo so kjlara obi li, ba wli bakwe. Ga llëbo lara Sbörë kës li, e shäryë eshko» le. Tjläno enishko ga tjläno jlökoyo, Sök İyado li ko go. Kjok dogo, klung ëre, dlung, e shäryaga li e, llëbo tjeng kës eshko li tjok.

⁸ E irgo ga kur ga ybö ter kjok dogo dwayo pjlara jek obi, tjlä bor kong ga «Pja nom, ga kjibokwo

roshwing pjir tjeng Sbö parkaga kojono shäng dlung kjing, klung kjing wloshko li kjrëba» le.

⁹ Eni ga tja jek öötong Sbö parkaga li zlong, ga kjibokwo li rokoror ba kong. Kuya ga tjlë bor kong ga «Kjrozong. Uozong. Zrërop bop kjak roy ga kup ga pjlëblë, or dyo dik, gueniyo jer öötong bop bögwö roshko ga bop bögwö li ie ber kë ara» le. ¹⁰ Eni ga kjröror ba wloshko dwayo, ga uoror. Tjeng bor kjak royshko ga pjlëblë, or dyo dik, gueniyo jer öötong bor bögwö roshko ga bor bögwö li iara beno kë ara.

¹¹ Eshko ga ëbo tjlë bor kong ga «lëbo wen tjëyoga oblë oblë tjok li, llëbo wen kjok shto oblë oblë sopga tjok li, llëbo wen nopga tjlë tjlökwo oblë oblë tjok li, llëbo wen pjlupga oblë oblë tjok li, e los jek obi» le.

11

Sbö tjlökwo lagaga do pjök

¹ Eshko ga tja kong kjorkwang twara ëborë kjlara, llëbo tjlïkkïo wleni, ga tjlë bor kong ga «Pja kojös, pja nom Sbö u tjlïk, öng sho sukklo jong ba zlong bäng li tjok, ga löng ba poshrëk eshko li shtëp bakoe. ² Gueniyo ba u bäng kjako li tjlïp llëm, e twak beno tjeng nopga judío llëm wleniyo li kong. Sbö kjokyo Jerusalén, e twak beno tjeng ba wloshko, epga jek löng, tek löng e roshko moglo sak pkëng kjingsho pjök (42) wlo. ³ Eshkoshko ga nopga ichër do pjök, bor tjlökwo roy lë oba kong dbargwo sak dbäw dbäw kjingsho sak dbäw pjloglo pjök kjingsho sak tjer (1,260) wlo. Ga shärye lok eni, doyono löng sopokklo shwongyo go» le.

⁴ Kjuk ère Tjlapgayo li boksho ga kjor lok do pjök ko *olivo*, iök shjiy bakwo lok do pjök bakoe. Kjur li, iök bakwo li, e nopga do pjök li jyäglo. ⁵ Èye tjwe ba shdung leshko ga iök to tur nopga do pjök li kjak roy dwayo, ga ba wloyoga tjwe löng li pjiya drete. Èye ba shdung woydè ga wolon eni kjluwe. ⁶ Epga kong dbo twaraba, shunyo slong, äär jong Sbö tjlökwö lara pjir guing. Ga kong dbo twaraba obi, di kjlopswè ber srèng wlo, swlo oblè oblè ichè tjwe kjök ère kjing go wlo bakoe.

⁷ Sbö tjlökwö lara lok pjir irgo ga äya owa sök pjlebgo jong rong anmoyö lishko li shrono shäng èngkjwono ba tjök, ga epga zröra. ⁸ E irgo ga ba doyo beno tjeng kjök tjwlo ara li irbo bäng go, Tjlapga Jesús zröraba pjang kjlös go dènashko kjokyo lishko. Kjuk eshko li, e so Sodoma kjokyo, Egipto kjokyo, e kjoyoe. ⁹ Ga nopga tjwe shinmoga tjeng li ik ara, tjèyoga oblè oblè uunkong, nopga tjle tjlökwö oblè oblè uunkong, kjök shto oblè oblè uunkong soga bakoe. Öör löng eni äär jong dbargwo mya kjingsho bëy, gueniyo èye wotjlino ba doyo tjeng li jnek llème. ¹⁰ Eshkoshko ga nopga löng kjök ère kjing go beno löng wopjlu, ga llèbo twara lok èng kong, ba sèngglo, shinmoga wolono dbaryo li shrèk wlo. Shäryara lok eni, löng sè obishko ga nopga li shduna Sbö tjlökwö lagaga lirè ara kjishko.

¹¹ Gueniyo öötong dbargwo mya kjingsho bëyshko ga woshwara Sbörè iröng obi, ga kojongö löng. İya nopga löng lirè ga bangkjre lok ara anmoyö. ¹² Eshko ga ybö kura nopga do pjök lirè ter kjök dogo dwayo pjlara, tjleno dbo go. Tjle ba kong ga «Pjây tèmö» le. Ga İya ba wloyogarè löng

wopro ga to jem kjok dogo, pjäng sho roshko.

¹³ Jekdo eshko ga yo to jem kësbang. Kjok eshko li shdöktong beno kjrिंगwo sak kjwara (10), ga kjrina lishko ga u lok li toktong pjir, ga nopga wolono doglo sak dbäw dbäw pjloglo kjäk (7,000). Beno löng sê li, Sbö sök kjok dogo li bangkjrara lok ara, ga iara lok beno kësbang, tjwlõ ara bakoe.

¹⁴ Llëbo owa anmoyõ pjök li jek tjän. Gueniyo kjrina obi li tjwe döröe.

Wli kjwara obi

¹⁵ E irgo ga Sbö parkaga kjlara obi, ba wli bakwara, e tjok ga öötong pjloglo kjäk (7). Eshko ga ëbo tjläno lok dbo ara kjok dogo. Tjlë ga

«Bi Tjlapga, ba Cristo,

e öötong beno löng nopga löng kjok kjing go li
pjluyoga,
ga iche lok ãyado» le.

¹⁶ E irgo ga tjlapgaga kjok llgwega wleniyo doglo sak pjök kjingsho pkëng (24) löng Sbö bokshto, ba pjlú sökklo kjwara kjwara kjing go li kjök tonon, ga Sbö poshrëra lok, ¹⁷ tjlä ga

«Tjlapga Sbö,

llëye shäryëp woydë li shäryëp ga pjlúe.

Pja sök ãyado.

Bop dbo ara go ga pja öötong sök nopga löng kës li ichaga.

Tjawa wopjlú bop tjok e kjïshko.

¹⁸ Tjëyoga löng kës li iirkono ara bop kongshko ga pja iirkono ara ba kong lok bakoe.

Shinmoga llgwezlong dbaryo li öötonge.

Bop parkagaga, bop tjlökwo lagaga, ba potjwlëzlong dbaryo li öötong bakoe.

Bop nopga tjwlõ ara, tjwlõ chira, bop ko
 bangkjrägaga löng kës,
 epga potjwlêp pjire.

Ga kjok pjiga li pjip drete» le.

¹⁹ Eshko ga Sbö u jong kjok dogo li u bäng roshwinaba jong oojong, ga roshko ba tjlökwo woyoshroklo bakpwo buk li ïnor. Eshko ga ilgwlëng tur jong lletlet llaw pogo, kjrik ri ri le ara, yo ian pjang, di zeng shrono ter kjwolong ara bakoe.

12

Walë, äya so Ööka kjoyo

¹ E irgo ga llëbo jyäglo weno pjang kësbang kjok dogo. Walë shäng kjlara eshko, doyono shäng dlo go wleni, mok pjang ba dre dirko, ga dbala tjeng ba kä kjing kjwo sak kjwara kjingsho pjök (12), pjlu dlu ioklo wleni. ² Walë li shäng kjlaraso llëm, ga ay le ara, chida buk dörö kjïshko. ³ Eshko ga llëbo jyäglo weno pjang kjrina obi. Äya kësbang sök kjlara kjlo srëzrën, so Ööka kjoyoe. Äya li kägä kjwo kjäk (7), pjlu dlu ioklo iak jong kjwara kjwara li kjing go, sjö kjwang sak kjwara (10) bakoe. ⁴ Dbala shdöktong beno kjringswo mya. Ga kjrara kjrina ba pjlak go, ga dbura ter lok kjok ëre kjing go. Eshko ga öötong sök walë li boksho, chida li wen bukshko ga ue jekdo wlo le.

⁵ E irgo ga chida buk kjlara domer. Llono ga tjëyoga löng kës li iche kjange. Gueniyo eshko ga chida li kjara Sbörë ey dwayo, ga söra jek öötong kjok dogo beno sök ba tjok. ⁶ Walë lira töktong jek öötong sök kjok shäryara Sbörë ba kong kjok dogro

no llëmshko lishko, ga dara Sbörë eshko dbargwo sak dbäw dbäw kjingsho sak dbäw pjloglo pjök kjingsho sak tjer (1,260).

Miguel ëngkjwono äya so Ööka kjoyo li tjok

⁷ E irgo ga Sbö parkaga kjok dogo so ko Miguel, e töno ba pjeyoga Sbö parkaga kjok dogo so tjok, ga ëngkjwono lok äya li tjok, äya pjeyoga kjok dogo so li tjok bakoe. ⁸ Ga äya li jenoë. E kjïshko ga epga beno löng eshko kjok dogo ame. ⁹ Äya li dburaba ter kjok ëre kjing go, ba pjeyoga kjok dogo so li tjok. Äya li, dgur dënashko li e. E kowëba Ä. Nopga Sbö miydë llëm wleniyo jyäpgwaga li e.

¹⁰ Eshko ga kur ga ëbo tjlëno dbo go kjok dogo.

Tjlë ga

«Eeri ga ba nopga döra Sbörë pjire.

Bi pjeyoga rotaga shkë dba bi Sbö bokshto li,
e dburaba jer kjok ëre kjing go.

E go ga Sbö dbo ara, Cristo dbo ara,
e ÿy wëlleë.

Ga Sbö beno sök bi pjlujo.

¹¹ Ä zana bi pjeyogarë pjir,

Öng Wlëp Ushko So Llgwoklë srëng li go,
Sbö tjlökwo lara lok li go bakoe.

“Tjawa mär Öng li go” le lok,
ga wolon li bangkjre lok llëme.

¹² E kjïshko ga pjäy löng kjok dogo,
pjäy wopjlúë.

Gueniyo pjäy löng kjok kjing go,
pjäy löng dlung roy,
pjäy song jlöë.

Ä to jer öötong shäng bomi shwoy,

ga iirkë ara,
 dbar ba kong beno sira dö kjïshko.
 Pjãylöng song jlö e kjïshko» le.

¹³ Äya so Ööka kjoyo li lono ter kjok ëre kjing go eni. Miydarashko ga to shäng chida li mekë irpjang. ¹⁴ Gueniyo walë li kong, sjägä twara Sbörë ko pjök, këskes, döbung sjägä wleni. E irgo ga sjägä li go ga dbuktong to, öötong sök kjok shäryara Sbörë ba kong kjok dogro no llëmshko lishko, shaya dgur lirë ga ä lishko, ga dara Sbörë eshko, lu pjloglo sak mya kjingsho bëy.

¹⁵ E irgo ga di ichara dgur lirë tur ba kjak roy dwayo, di kës wleni, walë li söya di lirë wlo le. ¹⁶ Gueniyo walë li kjimtara klung lirë, jyã dlöktong, ga di jer li dwara pjire. ¹⁷ E kjïshko ga äya li iirkono ara walë li kong, ga to ëngkjwë ba tjëyoga tek beno ba irgo li tjok. Nopga Sbö tjlökwo kolaga mär löng Jesús go li epga. ¹⁸ Äya lira beno sök dlung sor go erä.

13

Äya weno tëm dlung roy dwayo kjlara

¹ E irgo ga ïn ga äya wen tëm sök kjlara obi, dlung roy dwayo. Äya li kägä kjwo kjäk (7), sjö kjwang sak kwara (10), pjlungga dlu ioklo iak jong kwangna kwangna li kjing go. Ko jyã tak pjang kägä kwara kwara li go, Sbö läywoklo owa wleni.

² Äya li so dbong kjoyo, ba dre so äya kjïloshko so sok kësbang zok ara li dre kjoyo, ba kjak so dbong kjak kjoyo bakoe. Eshko ga iara Äya so Ööka kjoyo lirë beno sök ba pjlu sökklo kjing go, ga kong dbo

twara, oba iche wlo. ³ Īn ga äya li kägä kjwara zak jong ba skato, gueniyo pjano iröng. İya nopga löng kjok ère kjing go lirè ga yëy le lok erä, ga uunkong töno lok ba tjok. ⁴ Äya so Ööka kjoyo li poshrëra lok, dbo twara Äya li kong kjïshko. Äya weno tëm dlung roy dwayo li poshrëra lok bakoe. Tjlë lok ga «¿Ëye äär äya kjwe dikdo? ¿Ëye äya kjwe zangdo?» le lok eni.

⁵ Äya li iara Ärè krè ara wlo, tjlë tjlökwo Sbö läywoklo owa wleni wlo, oba ichë moglo sak pkëng kjingsho pjök (42) wlo bakoe. ⁶ Eshkoshko ga Sbö läywara owa jlökoyo, Sbö ko, ba u, nopga löng kjok dogo, e läywara owa uunkong. ⁷ E kong dbo twara Ärè to ëngkjwë Sbö nopga tjok wlo, ga epga zanae. Ga kong dbo twara Sbörë, kjok shto oblë oblë uunkong sopga, tjëyoga oblë oblë uunkong, nopga tjlë tjlökwo oblë oblë uunkong, e iche wlo. ⁸ Nopga löng kjok ère kjing go kës ko tak pjang Öng Wlëp Ushko So Llgwoklë zröraba li kjibokwoyo go llëm wleniyo, Äya li poshrëra lok. Kjok shäryayde Sbörë llëm obishko ga ëye ber sök së İyado Sbö tjok wlo ga ba ko, e tak lok kjibokwo ère go tjän.

⁹ Ëye kwomgwo tjok ga woyde ga kuya yõtso.

¹⁰ Ëye shakoba, sökoba kjok shto oblë wlo ga shakoba, sökoba kjok shto oblë.

Ëye zrökoba dröng go wlo ga zrökoba dröng go.

Miydëy tjlökwo ère go ga llëbo wen Sbö nopga kong owa ëmdë ga woyde ga kuya kjang, Sbö raye llëm bakoe.

Äya weno tëm klung roy dwayo kjlara

¹¹ E irgo ga ĩn ga äya wen tēm sök kjlara, klung roy dwayo. Äya li sjö kjwang pjök, so öng wlēp ushko so llgwoklē sjö kjoyo, gueniyo tjlē äya so Ööka kjoyo li dik. ¹² Era parkono Äya zak pjano li dbo go, ga nopga löng kjok ère kjing go kēs li iara ba poshrék. ¹³ Eshko ga llēbo ĩydēba llēm wleniyo shäryara kēsbang oblē oblē ara, kjrina li, iök ichara ter kjok dogo dwayo shrono kjok ère kjing go oba boksho. ¹⁴ Llēbo eni li shäryara äya bām ĩyo li kong. E go ga nopga löng kjok kjing go li jyāpgwara uunkong. Ga epga iara äya bām ĩyo li jyāglō shäryē kjlara, ie lok ber kēsbang, tjwlō ara wlo. Äya bām ĩyo li kjupāshko ga zaraba dröng go, gueniyo wolono llēm, pjano iröng obi. ¹⁵ Äya weno tēm klung roy dwayo li kong dbo twaraba, äya jyāglō shäryara nopgarē li iche tjlē wlo. Eshko ga èye äya jyāglō li poshrēra llēm ga ichara zrökoba wlo. ¹⁶ Ga nopga iara uunkong llēbo jyāglō ie ba bokdo go, llēm ga ba orkwo kēlēkong go. Nopga tjwlō ara wleniyo, nopga tjwlō chira wleniyo, nopga dbur ara wleniyo, nopga song wleniyo, parkagaga tjwlēk löng pjir wleniyo, nopga eni llēm wleniyo, e iara uunkong ba shäryē eni. ¹⁷ Eni ga èye llēbo jyāglō li iak lok llēm ga llēye tjwlēya ga ä, llēye soyneya ga ä bakoe. Llēbo jyāglō li, e äya ko li loklo, ba ko li shtoroy ga äär bayo kjöm li loklo bakoe.

¹⁸ Ba ko li shtēy ga äär bayo kjöm li miydēy wlo ga woyde ga shji kjok miydē ara. Èye kjok miydē ara ga shte ga pjlu, ga äär ber sak dbāw pjloglo tjer kjingsho sak tjer kjingsho tjer (666). Era domer kjlara li loklo.

14

Öng Wlëp Ushko So Ilgwoklë, nopga doglo sak dbäw dbäw pjloglo sak dbäw kjingsho sak dbäw dbäw pjloglo sak pkëng kjingsho sak dbäw dbäw pjloglo pkëng (144,000)

¹ E irgo ga ñnor jek obi, ga ñn ga Öng Wlëp Ushko So Ilgwoklë li sök Sión dlupygo go bor bokshto. Eshko ga yorkaga nopga doglo sak dbäw dbäw pjloglo sak dbäw kjingsho sak dbäw dbäw pjloglo sak pkëng kjingsho sak dbäw dbäw pjloglo pkëng (144,000), uunkong li bokdo go Öng li ko jyã tak pjang, Öng Data li ko jyã tak pjang bakoe. ² Eshko ga kur ga llëbo ter pjluk jong kjok dogo dwayo, pjluk li so di kës pjublunyo li pjlukyo kjoyo, so kjrik ri ri li pjlukyo kjoyo, so kjorkwang shäryak jong kjiyo tjok tÿy or go wleniyo tÿba löng li kjoyo bakoe. ³ Ga nopga löng li tono lok tÿkwo tjaglën, pjlu sökklo jong kjok dogo li bokshto, äya löng sÿ doglo pkëng (4) li bokshto, tjlapgaga kjok llgwegaga wleniyo li bokshto bakoe. Gueniyo nopga doglo sak dbäw dbäw pjloglo sak dbäw kjingsho sak dbäw dbäw pjloglo sak pkëng kjingsho sak dbäw dbäw pjloglo pkëng (144,000) li tokdo eröe. Nopga döktong löng kjok ëre kjing go li epga. Eye oblë tÿ ba tÿkwo li go ga äe. ⁴⁻⁵ Epga llëbo owa shäryono walëga tjok llëm, jyörkono llëm bakoe. Beno löng pogo llëye dret Sbö bokso erä. Ga to löng Öng li irgo, jek kjone lishko. Epga döriba nopga löng kës li tjrëko dwayo, ga twaraba Sbö kong, Öng li kong, ba sëngglo, bo kwirkono bäm ñyo li kjararaba, twaraba ba kong wleni.

Sbö parkagaga kjok dogo so doglo mya

⁶ Eshko ga in ga Sbö parkaga kjok dogo so dbuk pjang kjlara, tjlökwö pjlu ber iyado wlo li söya tjeng nopga löng kjok ere kjing go kes li kong, kjok shto oblë oblë uunkong sopga kong, tjëyoga oblë oblë uunkong kong, nopga tjle tjlökwö oblë oblë uunkong kong bakoe. ⁷ Tjleno pjang dbo go. Tjle ga «Nopga llgweya Sböre dbaryo li öotonge. E kjishko ga Sbö bangkjrozï, iozï ber kesbang, tjwlo ara, poshrëzi bakoe. Kjok uunkong shäryaga li e, kjopkwo, kjok ere, dlung, di wen lok kjone pogo bakoe» le.

⁸ Eshko ga Sbö parkaga kjok dogo so wen pjang ba irgo kjlara, tjle ga «jE pjitonge! jBabilonia kjokyo tjwlo ara li pjitonge! Tjëyoga oblë oblë pinggaga llebo owa shäryë oblë oblë li e. Epga ichara Sbö rayë bakoe. E pjitong e kjishko» le.

⁹ Eshko ga Sbö parkaga kjok dogo so wen pjang ba irgo kjlara obi. Tjleno pjang dbo go. Tjle ga «Ëye äya li poshrëk, ëye ba jyäglö li poshrëk, ëye bokdo go, lleëm ga orkwo go ba jyäglö li jyä tak pjang ga ¹⁰ Sbö iirkono ara ba kong. E kjishko ga ëye Sbö iono ber iirshko ga shdüya sorë ga epga shdüya eni bakoe. Epga suya akkwo ko *azufre* pjë jong ri ri li tjok, Sbö parkagaga kjok dogo so bokshto, Öng li bokshto bakoe. ¹¹ Epga shdüya eni iyado, ba iök li sjer lleëm shkë jik, dba jik. Shäryë eni, äya li poshrëra lok kjishko, ba jyäglö li poshrëra lok kjishko, bokdo go, lleëm ga orkwo go ba jyäglö li jyä tak pjang kjishko bakoe» le.

¹² Miydëy tjlökwö ere go ga llebo wen Sbö nopga, ba kolagaga li kong owa ëmdë ga woyde ga kuya

kjang, Jesús raye llëm bakoe.

¹³ Eshko ga kur ga ybö ter kjok dogo dwayo pjlara, tjlä ga «Tjläkwo ëre tozong. Eeri jek lëkong ga ëye mär beno löng Tjlapga Jesús go wolonoshko guing ga ber wopjlú» le.

Kuya Sbö Sëyarë ga tjlä ga «Ëng, eni. Epga sjeno parkorbo, ga potjwläya Sbörë ba pak'li kjishko» le.

Dwla bo skozlong dbaryo, kjillgwo bo skozlong dbaryo

¹⁴ Eshko ga ñnor jek obi, ga ñn ga pjäng sho wen pjang kjrina pjlublún, kjing go sök kjlara so no to ter kjok dogo dwayo li kjoyo, dlu kjing go pjlu dlu ioklo pjang kjwara shäryak dbur sho shöylör go, wloshko dröng tjeng kjwangna zöng. ¹⁵ Eshko ga Sbö parkaga kjok dogo so opshino shäng kjlara, Sbö u jong li roy dwayo, ga tjläno sök pjäng sho kjing go li kong dbo go. Tjlä ga «Dwla bo kwirkono tjän, ga dwla bo skozlong dbaryo öötonge. E kjishko ga bop dröng kjwe sös, ga pja nom dwla bo tjeng li skok» le. ¹⁶ Kuya ga ba dröng li go ga dwla bo tjeng kjok ëre kjing go kës li zakza tas erä.

¹⁷ Eshko ga Sbö parkaga kjok dogo so opshino shäng kjlara obi, Sbö u jong kjok dogo li roy dwayo, wloshko dröng tjeng kjwangna zöng bakoe. ¹⁸ E irgo ga Sbö parkaga kjok dogo so wen shäng kjlara obi. E parkë shäng iök pjë jong ri ri llëbo lö pjlëblë sukklo kjing go li dë, sjer llëm wlo. Eshko ga tek shäng öng sukklo jong li shwoy dwayo, ga tjläno wloshko dröng tjeng li kong dbo go. Tjlä ga «Kjillgwo bo kwirkono tjän. E kjishko ga bop dröng kjwe sös, ga pja nom jer kjok kjing go, kjillgwo

bo tjeng li töng» le. ¹⁹ Kuya ga ba dröng li go ga kjillgwo bo tjeng kjok ere kjing go kës li zakza tas, ga dbukza jer kjillgwo bo llruzlong shtoyo li roshko. E no shdüzlong shtoyo li loklo, eye Sbö iono iirshko ga shdüya tjeng lishko. ²⁰ Kjillgwo bo llruzlong shtoyo li jong kjok eshko li worbo go. Eni ga kjillgwo bo li llrura eshko, ga ba srëng li tur jer jong e roy dwayo di kësbang wleni, öötong kjlay kwomgla kjëngso go, äär jong pjolae. Shji äär ba pjlarbo wlo ga woyde ga shji jëk dbargwo sak kjwara (10) dik.*

15

Sbö parkagaga kjok dogo so doglo kjäk (7), no shdungglo kjrënggwo kjäk (7)

¹ E irgo ga ïn ga llëbo jyäglo wen pjang kësbang kjok dogo kjrëna obi. Sbö parkagaga kjok dogo so tjeng doglo kjäk (7), no shdungglo söya tjeng kjrënggwo kjäk (7) ba tjok. Sbö iir li pjir e go. ² Eshko ga llëbo ïn buk so dlung shäryak batlë sho go kjoyo, roshko iök. Dlung li sor go nopga kojono tjeng ara, äya li zana lok, ba jyäglo li zana lok, ba ko li shtoroy ga öötong kjöm li zana lok bakoe. Kong kjorkwang shäryak jong kjiyo tjok tÿy or go wleniyo twara Sbörë kjwara kjwara tjän, ga beno tjeng ba wloshko. ³ Eshko ga tono lok Sbö parkaga tek dënashko so Moisés li tÿkwo, Öng li tÿkwo bako, tÿkwoyo eni:

«Tjlapga Sbö,

* **14:20** Shji jëk dbargwo sak kjwara dikle li, e kilómetro kjrënggwo sak dbaw pjloglo mya (300) loklo.

llëye shäryöp woydë li shäryöp ga pjlúe.
 Bop pak shäryorop li,
 e kësbang, wolëso.

Llëbo bek li,
 e shäryopdë.

Tjëyoga kës pjluyo ñyado li pja eröe.

⁴Tjlapga, ëye, pja bangkjre llëmyo drete.

Ëye, bop ko ie ber kësbang, tjwlö ara llëmyo drete.

Pja eröe.

Ëye oblë eniyo drete.

Bop pak pjlö bek li beno wëlä,

tjëyoga tjeng kës li äär bop poshrök e kjïshko.»

⁵ E irgo ga ñnor jek obi, ga ñn kjok dogo ga Sbö u jong eshko li jong oojong. ⁶ Ga Sbö parkagaga kjok dogo so opshino tek ba roy dwayo doglo kjäk (7), no shdungglo söya tjeng kjringgwo kjäk (7) ba tjok. Doyono löng shwong ko pjlublún, drëpdre, pjlú, tjwlö ara wleniyo go, dop pjrikklo shäryak dbur sho shöylör go pjang ba pjlú kjing go. ⁷ Eshko ga äya löng së doglo pkëng (4) kjlara, epga kong di ioklo twara kjwara kjwara, shäryak dbur sho shöylör go, roshko Sbö Sök ñyado li iir. ⁸ Ga Sbö u jong li dlino jong yö sho go, Sbö dbo kälä tjeng eshko kjïshko. Eni ga ëye opzrök jek ba roy ga ä, äär jong no shdungglo kjringgwo kjäk (7) söya Sbö parkagaga doglo kjäk (7) lirë tjeng ba tjok li shäryono pjir guing.

16

Di ioklo kjwo kjäk (7) roshko Sbö iir

¹ Eshko ga ybö kuror tek Sbö u jong li roy dwayo pjlara, tjläno Sbö parkagaga doglo kjäk (7) li kong. Tjlë ga «Pjäy nom Sbö iir tjeng di ioklo kjwo kjäk (7) roshko kjwe kwong kjok kjing go» le. ² Kuya lok ga Sbö parkaga bäm ïyo li, llëbo tjeng ba di ioklo roshko li kwona ter kjok ëre kjing go, ga nopga jyã tak lok äya jyãglo go, äya poshrëgaga löng li, e poglo go üta weno ara, bang ara.

³ E irgo ga Sbö parkaga kjlara obi, llëbo tjeng ba di ioklo roshko li kwona ter dlung kjing, ga dlung dyo li kworkwono beno oblë, so shinmoga srëngyo kjoyo, ga llëbo tjeng kës dlung roy li kjëtong drete.

⁴ E irgo ga Sbö parkaga kjlara obi, llëbo tjeng ba di ioklo roshko li kwona ter di llë, diwa llë, e kjing, e tjok ga öötong pjloglo mya. Eshko ga di li kworkwono beno srëng. ⁵⁻⁶ Eshko ga Sbö parkaga kjok dogo so kuror kjlara. Di llë ichaga li e. Tjlë ga «Sbö, pja sök ïyado.

Pja eröe.

Nopga löng li,

bop nopga srëng li shira,

bop tjlökwö lagaga srëng li shira bakoe.

E kjïshko ga

iorop beno löng srëng ië, ba shdungglo.

Kjok llgwerop eni li,

e beke» le.

⁷ Eshko ga kur ga llëbo lö pjlëblë sukklo jong li öö le, tjlä ga

«Ëng, Tjlapga Sbö,

llëye shäryëp woydë li shäryëp ga pjluë.

Kjok llgwerop sorë li,

e beke» le.

⁸ E irgo ga Sbö parkaga kjlara obi, llëbo tjeng ba di ioklo roshko li kwona jek dlo kjing, ga dlo li kong dbo twara, nopga löng li suya ba kälä dbo ara li go wlo. ⁹ Eshko ga nopga löng li sura dlo kälä lirë ara. Eni ëmdë ga llëbo owa shärye löng li rayara lok llëm, Sbö iara beno kësbang, tjwlö ara llëm bakoe. Llëbo owa li ichara Sbörë ba kong kuzong ga beno löng Sbö ko li läywë owa erä.

¹⁰ E irgo ga Sbö parkaga kjlara obi, llëbo tjeng ba di ioklo roshko li kwona ter äya pjlu sökklo jong li kjing go, e tjok ga öötong pjloglo shkëng (5). Eshko ga äya li kjokyo ro zoktong beno yët erä. Nopga löng li bang ara kuzong ga beno löng ba kjoyorkwo uë. ¹¹ Eni ëmdë ga llëbo owa shärye löng li rayara lok llëm, beno löng Sbö sök kjok dogo li läywë owa erä, ba bang ara li kjishko, ba üta li kjishko bakoe.

¹² E irgo ga Sbö parkaga kjlara obi, llëbo tjeng ba di ioklo roshko li kwona jer Éufrates diyo li kjing, ga di li dano beno dogro, pjlunga tek dlo wen tëm shwo lëkong dwayo li jek dipzë ba ëngkjwagaga tjok di kar ga pjlu wlo. ¹³ Eshko ga ïn ga sëyaga owa wen tjeng doglo mya, so kjläk kjoyoe. Kjlara opshino tek äya so Ööka kjoyo li kjak roy dwayo, kjlara opshino tek ba pjeyo äya owa li kjak roy dwayo, kjlara opshino tek äya dboryaga owa wleniyo li kjak roy dwayo bakoe. ¹⁴ Eshko ga sëyaga owa li to löng llëbo ïydëba llëm wleniyo shäryë oblë oblë. Ga pjlunga löng kjok kjwang jikong li tona lok, ëngkjwë Sbö tjok, no llgwezlong dbaryo lishko. Sbö, llëye shärye woydë li shärye ga pjluë.

¹⁵ Cristo tjlokwo woyoshroziä. Tjlëno ga «¡Pjäy sjëke! Tja tjwe, oba tjwe lürkë ä wleni. Ëye sök bor

koshë jlôkoyo, sök së, ba shwong shäryak tjeng pjir ba tjok wleni ga ber wopjlu eshko. Eshko ga to shäng kjwor wleni llëm, llëye lökyotke llëm bakoe» lara eni.

¹⁶ Eni ga pjilupga li töna lok pjir, söra lok öötong löng kjok kjrinishko. Hebreo tjlôkwo go ga kjok eshko li ko Armagedón.

¹⁷ E irgo ga Sbö parkaga kjlara obi, llëbo tjeng ba di ioklo roshko li kwona jek aan, pjluk jek pjang li kjing, e tjok ga öötong pjloglo kjäk (7). Ga ëbo tjlëno dbo go pjlu sökklo jong Sbö u jong li roy dwayo. Tjlë ga «Uunkong li shäryono pjire» le. ¹⁸ Eshko ga llgwlëng tur jong lletlet llaw pogo, kjrik ri ri le ara, yo ian pjang kësbang, dbo ara bakoe. Nopga iara Sbörë beno tjeng kjok ëre kjing go tek lëkong ga yo ÿydë eni llëme. ¹⁹ Babilonia kjokyo tjwlö ara li, e shdöktong beno kjringswo mya, ga tjëyoga oblë oblë li kjokyo pjitong dret bakoe. Babilonia soga shduna Sbörë ba iir ara li go eni, llëbo owa shäryara lok ara li kjishko. ²⁰ Dlung tjrëko llë, di tjrëko llë, dlup llë, e jer piktong drete. ²¹ Ga di zeng shrono ter kwolong nopga beno löng li kjing go. Kjwara kjwara kwing ara kwing dunggwo kjwo sak dbäw (100) wleni dik.* Eshko ga nopga löng li shduna Sbörë kjang anmoyö eni kuzong ga Sbö läywe lok owa erä.

17

Walë owa kjlara, äya kjlara

* **16:21** Dunggwo kjwo sak dbäw (100) dik, e kwing libra sak dbäw (100) wleni dik.

1-2 Eshko ga Sbö parkagaga kjok dogo so doglo kjäk (7), wloshko tjeng di ioklo kjlara tek shrono shäng bor zlong, ga tjlä bor kong ga «Kjok buk kjrina, di arashko. Walë sök kjlara eshko, to shäng opsoynek domerga oblë oblë kong wleniyo. Pjlupga löng kjok ëre kjing go li pono ba tjok, ga ba nopga tjeng kës li ichara llëbo owa shäryë oblë oblë, ichara Sbö rayë bakoe. Eni ga pja tek bor tjok, walë li shdüya Sbörë li ip wlo» le.

3 Eshko ga tja go Sbö Sëya jlökoyo, ga tja söra parkaga lirë jek kjok dogro no llëmshko. Eshko ga ïn ga walë sök kjlara, äya sök kjlara li kjing go. Äya li kjlo srëzrën, kägä kjwo kjäk (7), sjö kjwang sak kjwara (10) bakoe. Ba doyo li go, ko jyã tak lok oblë oblë llaw pogo, Sbö läywoklo owa wleni. 4 Walë li doyono sök shwong ko dingding shwëshwë go, shwong ko srëzrën go bakoe. Shwong li go, llëbo wolësowa smok lok ara, dbur sho shöylör, akkwo wolësowa tjwlö ara wleniyo oblë oblë bakoe. Wloshko di ioklo tjeng kjwara, shäryak dbur sho shöylör go, llëbo owa shäryara li, llëbo shäryako llëm shäryara li, e tjeng ba roshko. 5 Llëbo jyã tak pjang ba bokdo go, gueniyo llë loklo miydëba llëme. Tak pjang eni: «Babilonia kjokyo tjwlö ara li tja. Walëga to löng opsoynek domerga oblë oblë kong wleniyo pingga li tja. Nopga ichaga llëbo shäryako llëm shäryë li tja bakoe.» 6 ïn ga walë li sök nelö, srëng iono ara kjishko. Sbö nopga to löng Jesús roy lë oba kong zröra li, e srëngyo iayde. ïn ga yëylër erä.

7 Eshko ga Sbö parkaga li tjlä bor kong ga «¿Pja opshgawë ega? Walë jek sök äya kjing go li llë loklo lër bop kong. Äya kägä kjwo kjäk (7), sjö kjwang

sak kjwara (10), e llë loklo lër bop kong bakoe. ⁸ Äya ñop li dënashko ga sök së, gueniyo eeri ga sök ame. Gueniyo llono ga wen tēm pjlëbgwo jong rong anmoyō li roy dwayo, ga to jongya shdūya, pjiya Sbörë wlo. E kjïshko ga nopga löng kjok ère kjing go ko tak pjang Sbö kjibokwoyo go llëm wleniyo kës li, äya li ñya lok ga yëy le lok erä. Kjok shäryayde Sbörë llëm obishko ga èye ber sök së ñyado Sbö tjok wlo ga ba ko, e tak pjang kjibokwo ère go tjän.

⁹ »Llëbo ère llë loklo miydëy wlo ga woyde ga shji kjok miydë ara. Äya kägä kjwo kjäk (7) li, e dlup lok kjwo kjäk (7) loklo, ga walë li sök ba kjing go. ¹⁰ Ba kägä kjwo kjäk (7) li, e pjlupga doglo kjäk (7) loklo bakoe. Pjlupga shkëng (5) jüni wolono tjän, kjlara sök eerishko, ga kjlara obi tjwayde llëm obi. Shrono ga ber sök wop sira döe. ¹¹ Äya dënashko ga sök së, gueniyo eeri ga sök ame li, e pjlü kjlara obi loklo, e tjok ga äär doglo kjwong (8). Pjlupga doglo kjäk (7) kjlara woshrono iröng obi li e, gueniyo to jongya shdūya, pjiya Sbörë wlo bakoe.

¹² »Sjö kjwang sak kjwara (10) ñop li, e pjlupga doglo sak kjwara (10) wentë llëm obi li loklo. Llono ga kong dbo twëba, parkë ber löng no pjluyoga äya li tjok wop sira bakoe. ¹³ Eshkoshko ga wotjlik lok kjrinaso, ga ba dbo li twe lok äya li kong, ba nopga tjeng kës li iche wlo. ¹⁴ Ga ëngkjwë lok Öng Wlëp Ushko So Ilgwoklë li tjok. Gueniyo Öng li, no kägäyoga uunkong kägäyo li e, pjlupga uunkong pjluyo li e bakoe. E kjïshko ga epga zäya. Ba nopga rokara, kjrara, mär löng ba go ñyado li löng ba tjok eshko.

¹⁵ »Walë to shäng opsoynek domerga oblë oblë

tjok wleniyo li ĩnop sök di arashko. Di li, e tjëyoga oblë oblë li loklo, nopga tjlë tjlökwo oblë oblë li loklo bakoe. ¹⁶ Sjö kjwang sak kjwara (10) lok äya go li, walë owa li ĩywa lok shjiktëng, shdüya lok ara, ga ie lok ber shäng kjwor. E irgo ga sho ue lok, ga doyo suya lok iök go. ¹⁷ Epga wotjlıno kjrinaso li, ba dbo twara äya kong li, e laga Sbörë, lara eni tek dënashko kjışhko. Ga shärye lok eni, äar jong llëye lara Sbörë li shäryono pjir guing.

¹⁸ »Walë ĩnop li, e kjok tjwlō ara loklo, pjłupga löng kjok ëre kjing go ichaga sök lishko» le.

18

Babilonia kjokyo pjitonge

¹ E irgo ga ĩn ga Sbö parkaga kjok dogo so ter shäng kjlara obi, kjok dogo dwayo. E dbo ara, ga kjok ëre kjing iara ba kälä ara lirë beno buk shjiye. ²⁻³ Eshko ga tjlıno dbo go. Tjlë ga «ıE pjitonge!

ıBabilonia kjokyo tjwlō ara li pjitonge!

Tjëyoga oblë oblë, llëbo owa oblë oblë pina ba kong li,

e shäryara lok pjir,

Sbö rayara lok bakoe.

Pjłupga löng kjok ëre kjing go kjlobi li,

e pono ba tjok wleni.

Llëbo soynega kjok ëre so li,

e dbur shano ara,

kjok eshko soppa dbur zano ara kjışhko.

E kjışhko ga kjok eshko li kworkwono beno buk Ä

sëyaga shtoyo shara,

sëyaga owa oblë oblë löng eshko.

Sënwa owa, woydëy llëm wleniyo,

e usho shäryë lok eshko bakoe»* le.

⁴ Eshko ga kur ga ybö ter kjok dogo dwayo
pjlara, tjlä ga

«Bor nopga, pjäy opshis kjok kjweshko dwayo,
llëbo owa shärye nopga löng kjweshkorë li
shäryëmi llëm wlo,
kjwepga shdüya Sbörëshko ga pjäy shdüya eni
llëm bako wlo.

⁵ Nopga löng kjweshko li go owa ara,
kjlay kjok dogo.

Kjwepga shdüya Sbörë ara,
llëbo owa shäryara kës li kjïshko» le.

⁶ Eshko ga ybö li tjläno nopga shdunggaga li kong.
Tjlä ga

«Nopga kjwe llëbo shäryono oblë kong owa sorë ga
shäryozï ba kong eni pjloglo pjök.

Oblë shduna sorë ga
nopga kjwe shdüzi eni pjloglo pjök bakoe.

⁷ Llëbo shäryara ba kong om go ara, dbur zano ara,
ber löng wopjlú wlo.

Eni ga llëbo shäryozï ba kong owa bayo eni,
ber löng woydë ara wlo.

Eerishko ga to löng krë ara. Tjlä ga

“Tjawa pjlu boy wleni, tjawa äär ber syä wleni
llëm,

llëye wen borwa kong owa wlo drete” le.

⁸ Eni kuzong ga dbar kjwara ga llëbo wen ba kong
owa oblë oblë,
kjone kjone wolon,

* **18:2-3** Tek dënashko ga kjibokwo ëre jyä shiraba oblë oblë ara. Ga
kjone kjone tjlä ga «... e usho shäryë lok eshko, ga äya owa, woydëy
llëm wleniyo, e löng eshko bakoe.»

kjone kjone slar ara,
 kjone kjone pjli kuk ara bakoe.
 Epga shdūya Tjlapga Sbörë, ba dbo ara go,
 ga ba kjok buk kës'li suya iök go, ber dret wlo»
 le.

⁹ Pjilupga löng kjok ëre kjing go pono walë li
 tjok wleni li, llëbo shäryara ba kong om go ara,
 dbur zano lok ara bakoe. Shäryara lok eni, ber
 löng wopjlu baīya dik wlo. Eni ga kjok li pjë jong
 ri rishko ga ba yō sho jem li īya lok ga slar ara,
 kjloshtë ara ba kjīshko. ¹⁰ Eshko ga walë li shdūya
 Sbörë ara eni li īya ga bangkjre lok ara. Ber löng
 kjloshtë ara pjolae. Tjlë lok ga

«jBabilia sopga, pjāy tjwlō ara, dbo ara,
 gueniyo pjāy shduna ara, ga pjāy pjitong
 mālinge!

jPjāy song jlōe!

jPjāy song jlōe!» le lok eni.

¹¹ Eshko ga llëbo soynegaga kjok ëre so li
 slar ara, kjloshtë ara, llëbo tjwlëkoba eshko ame
 kjīshko. ¹² Dbur sho shōylōr, dbur sho pjublún,
 akkwo wolësowa tjwlō ara wleniyo oblë oblë, e
 tjwlëkoba eshko ame. Shwong ko pjublún, pjlu
 tjwlō ara wleniyo, shwong ko dingding shwëshwë,
 shwong pjlu wleniyo ko *seda*, shwong ko srëzrën,
 e tjwlëkoba eshko ame. Kjorkwang lō pjlēblë
 wleniyo oblë oblë, llëbo wolësowa oblë oblë shäryak
 llëbo ko *marfil* go, shäryak kjorkwang tjwlō ara
 wleniyo go, shäryak dröng sho so klung sho kjoyo
 go, shäryak dröng sho go, shäryak ak ko *mārmol*
 go, e tjwlëkoba eshko ame. ¹³ Dli mokyō oblë
 oblë, llëbo lō pjlēblë suy wlo, dwlo poshtikklo lō

pjlëbïë oblë oblë, poshtikklo lõ pjlëbïë wleniyo oblë
oblë, kjillgwo bo dyo dbo ara, kjoyo pjlú wleniyo,
pjlung shosho pjlú wleniyo, e tjwlëkoba eshko ame.
Sögla, öng wlëp ushko so, kwomgla, jëkklo dop-
shiga kwomglarë wleniyo, parkagaga tjwlëk lõng
pjr wleniyo, nopga oblë oblë, e tjwlëkoba eshko
ame.

¹⁴ Eshko ga llëbo soynegaga li tjël lok ga
«jBabilonia sopga,
llëbo woydoromi ara li,
e pjitong drete.
Llëbo oblë oblë tjwlö ara bomi kong li,
e pjitong dret bakoe.
jPjã song jlöe!

jPjã song jlöe!» le lok eni.
¹⁵ Eshko ga epga shdüya Sbörë ara eni li ñya llëbo
ëre soynegaga lõng lirë ga bangkjre lok ara. Ber
lõng slar ara, kjloshtë ara pjolae. ¹⁶⁻¹⁷ Tjël lok ga
«jBabilonia sopga,

pjã doyono lõng shwong ko pjlublún, pjlú
tjwlö ara wleniyo go,
shwong ko dingding shwëshwë go
shwong ko srëzrën go bakoe!
jPjã obrikkwo wolësowa oblë oblë
shãryak dbur sho shöylör go,
shãryak akkwo wolësowa tjwlö ara wleniyo
oblë oblë go bakoe!
Gueniyo llëbo tjwlö ara tjeng kës li pjitong
malinge!
jPjã song jlöe!

jPjã song jlöe!» le lok eni.
Eshko ga kjoyong kës kës sögaga, ba kägäyoga,
nopga jëk lõng kjoyong kës kës go, e ber lõng pjola

bakoe. ¹⁸ Ga kjok'li pjë jong ri rishko ga ba yõ sho jem'li ñya'lok ga slar ara ba kjĩshko. Tjĩlë'lok ga «Kjok oblë äär tjwłõ ara, kjok kjweni dik ñlëme» le'lok eni. ¹⁹ Eshko ga klung sho iara ba kã kjing go, lõng woydë ara li'loklo, ga slar ara, kjłoshtë ara. Tjĩlë'lok ga

«Babilonia sopga,

 pjãy dbur ara kjĩshko ga

 kgyong kës kës sogoga kës'li dbur shano ara.

¡Gueniyo pjãy pjítong malinge!

¡Pjãy song jłõe!

 ¡Pjãy song jłõe!

²⁰ ¡Gueniyo kjok dogo so,

 Sbõ nopga,

 Sbõ tjłõkwo roy'lagaga Jesús ãska,

 Sbõ tjłõkwo'lagaga,

 pjãy shduna'lok ara kuzong ga

 epga shduna Sbörë ara bakoe!

¡Pjãy lõng wopjłú e kjĩshko!» le.

²¹ Eshko ga Sbõ parkaga kjok dogo so dbo ara wleniyo kjłara apkwo kjrono kjwara kësbang, bayo dwla kjwokãkkłõ apkwoyo wleni, ga dbura jer dlung roy, ga tjłë ga

«Apkwo dburor'li piktong dret,

 beno ñgöy ame.

Babilonia kjokyo'li pjir dret,

 ber ñgöy ame eni bakoe.

²² Kjorkwang shãryak jong kjiyo tjok tÿ or go

 wleniyo, dbonmo, wli,

 e tÿba eshko ame,

 ga ñye tÿ eshko ame bakoe.

Ëye parkë eshko ame,

ga oba parkë löng li pjlukyo kuy eshko ame bakoe.

²³ Iök shjiy eshko ame,
ëye orkwosmok eshko ame bakoe.

Dënashko ga llëbo soynegaga kjok eshko so li tjwlõ ara.

Ga tjëyoga oblë oblë jyãpgwara ba nopgarë ba ybi sho li go.

²⁴ Sbö tjlökwo lagaga, Sbö nopga, nopga oblë, e zröraba ara kjok eshko» le.

19

Shji Tjlapga poshrëk ara

¹⁻² E irgo ga kur ga nopga träk llëm, öö le ara kjok dogo. Tjlë lok ga

«¡Shji Tjlapga poshrëk ara!

Walë to shäng opsoynek domerga oblë oblë kong wleniyo li,

nopga löng kjok kjing go li ichara llëbo owa shäryë oblë oblë,

ichara Sbö rayë bakoe.

Sbö nopga zröra ara kjishko ga walë li shduna Sbörë.

Kjok llgwera sorë li, e beke.

Bi Sbö, e kësbang, tjwlõ ara, dbo ara bakoe.

Bi döga kjlaraso li e» le.

³ Ga öö le lok obi, tjlë ga

«¡Shji Tjlapga poshrëk ara!

Walë li doyo pjë ber buk ÿyado,

pjë yõyo jem jong li slan llëme» le.

⁴ Eshko ga tɔlapgaga kjok lɔgwega wleniyo doglo sak pɔjok kjingsho pkɛng (24) li, e kjök tonu, ga Sbö sök pɔlu sökkɔ kjing go li poshrëra. Tɔlë lok ga «ɔBer eni!

ɔShji Tɔlapga poshrëk ara!» le.

⁵ Eshko ga ëbo tɔlëno pɔlu sökkɔ jong lishko dwayo. Tɔlë ga

«ɔSbö parkagaga,

Sbö bangkjragaga,

pɔy tɔwɔ arare, de llëmde, e llëno llëme.

Bi Sbö poshrëzi pɔy uunkongdë!» le.

⁶ Eshko ga kur ga nopga träk llëm, öö le ara, pɔluk li so di kës pɔlublunyo li pɔlukyo kjoyo, so kjrik ri ri li pɔlukyo kjoyo bakoe. Tɔlë lok ga

«ɔShji Tɔlapga poshrëk ara!

Bi Tɔlapga Sbö,

llëye shärye woydë li shärye ga pɔlúe.

Öötong sök nopga uunkong pɔluyo tɔän.

⁷ Shji wopɔlú e kjishko,

iëy ber kësbang, tɔwɔ ara bakoe.

Öng Wlëp Ushko So Lɔgwoklë orkwosmozlong dbaryo li öötong,

ba boy poshäryono pɔir,

sök ba koshë.

⁸ Kong shwong twara Sbörë doyë e go wlo.

Shwong li ko pɔlublún, pɔlú tɔwɔ ara, drëpdre, stek wleniyo» le.

(Shwong le li, e llëbo pɔlo bek shäryara Sbö nopgarë oblë oblë li loklo.)

⁹ Eshko ga Sbö parkaga kjok dogo so li tɔlë bor kong ga «Tɔlökwo ëre tozong. Ëye mana Sbörë tek Öng Wlëp Ushko So Lɔgwoklë orkwosmozlong

dliyo li uë ga ber wopjlúe» le. Ga tjlë obi ga «Tjlökwo ëre lara Sbörë li, e beke» le.

¹⁰ Kur ga tja kjök tono parkaga li bokshto, ga poshrër loror. Gueniyo tjlë bor kong ga «iKjwe shäryëp llëme! iTja parkaga Sbö kong eröe! iPja, bop pjeyoga mär löng Jesús tjlökwo go li, pjäy eni bakoe! jËye Jesús tjlökwo roy lë ga e Sbö tjlökwo laga! jE kjishko ga Sbö poshrëpdë dey!» le.

Kjlara sök kwomgla kjlo pjublún kjing go

¹¹ Eshko ga kjok dogo roshwino beno jong oo-jong, ga ïn ga kwomgla sök kjlara kjlo pjublún. Kjing go sök kjlara. Llëye le li shärye eni ïyado lëba, tjlökwo bek laga li e lëba bakoe. Kjok llgweya bek, ga ëngkjwë ba wloyoga tjok bek bakoe. ¹² Ba bokkwo so iök pjë lok ri ri kjoyo, ba kä kjing go pjilupga dlu ioklo lok ara. Ko jyã tak pjang ba go kjwara, miydaga erë om go eröe. ¹³ Doyono sök shwong pöraba srëng go pjir li go. E ko Sbö Tjlökwo. ¹⁴ Ëngkjwagaga kjok dogo so uunkong li jek löng kwomgla kjlo pjublún kjing go ba irgo, doyono löng shwong ko pjublún, pjlu tjwlö ara, drëpdre, stek wleniyo go. ¹⁵ Dröng tur jong sök kwomgla kjing go li kjak roy kjwangna, kowo stek, tjëyoga oblë oblë tjeng kës li pjiya e go wlo. Llëye shärye woýdë Sbörë li shärye ga pjlu, ga iirkono ara nopga löng li kong. E kjishko ga domer li ichara ba shdung kjang, shji kjillgwo bo shglëroy bi dre go wleni. Jlökyo ga epga iche kjange. ¹⁶ Ko jyã tak pjang kjrina, ba shwong pjang li go, ba kworbo do li go bakoe. Ko li tak pjang eni «Pjilupga Uunkong Pjluyo, No Kägäyoga Uunkong Kägäyo.»

¹⁷ Eshko ga ñn ga Sbö parkaga kjok dogo so shäng kojong kjlara, dlo kjing go. Ga tjläno sënwa sjëng uaga dbuk lok kjok dogo kës li kong dbo go. Tjlê ga «Pjäy tönzong, Sbö dliyo kësbang li uëmi wlo. ¹⁸ Eshko ga pjlupga doyo sho, ëngkjwaga kägäyoga doyo sho, nopga tjwlö ara wleniyo doyo sho, kwomgla doyo sho, ba sögaga doyo sho, e uëmi ga pjlú, nopga uunkong tjwlëk löng pjir wleniyore, de llëmde, tjwlö arare, de chirare, uunkong li doyo sho uëmi ga pjlúe» le.

¹⁹ Eshko ga ñn ga pjlupga löng kjok ëre kjing go, ba ëngkjwagaga kës li tona lok äya owa li tjok, ëngkjwë sök kwomgla kjing go li tjok wlo, ëngkjwë ba ëngkjwagaga jek löng ba tjok li tjok wlo bakoe. ²⁰ Eshko ga äya owa li shara ba wloyoga lirë, ga dbura jer akkwo ko *azufre* pjë jong ri ri shtoyo li roshko, ba dboryaga owa wleniyo li tjok. Shto, e kësbang, so dlung kjoyoe. Kjudäbäshko ga ba dboryaga li, llëbo ñydëba llëm wleniyo shäryara oblë oblë ba kong, ga nopga jyã tak lok äya jyäglö go, äya poshrëgaga löng li, e jyäpgwara e go. ²¹ Ga ëngkjwë löngshko ga nopga tönö tjeng äya owa tjok li, e zröra dret, dröng tur jong sök kwomgla kjing go li kjak roy li go. Eni ga sënwa li lono ba sho beno tjeng li uë, beno löng bökö tjung ara, no sho li go.

20

Lu pjlöglo sak dbäw dbäw (1,000)

¹ Eshko ga ñn ga Sbö parkaga kjok dogo so to ter kjok dogo dwayo kjlara, wloshko tjeng pjlëbgwo jong rong anmoyö li dökklo, no shakklo shäryak dröng sho go tjeng pjlara kësbang bakoe. ²⁻³ Ga äya

so Ööka kjoyo li shara, ga pjrira, ber buk eni lu pjloglo sak dbäw dbäw (1,000) wlo. E irgo ga dbura jer pjlëbgwo jong rong anmoyō li roshko, kjing bängzara yōtso, tjëyoga oblë oblë jyäpgwe llëm, äär jong lu pjloglo sak dbäw dbäw (1,000) wlo. Eshko ga döya jek pjlara obi, wop sira wlo. Äya li, e Ä om go.

⁴ Eshko ga ïn ga nopga sirkeno tjeng kjlöbö, pjlu sökklo tjeng li kjing go. Epga kong dbo twara Sbörë nopga llgwek wlo. Dënashko ga nopga kä zaraba ara, Jesús roy lara kjishko, Sbö tjlökwō roy lara kjishko bakoe. Äya owa li poshrëra lok llëm, ba jyäglo li poshrëra lok llëm, bokdo, orkwo, e tak lok ba jyäglo go llëm bakoe. Nopga eniyo li sëyaga ïnor tjeng eshko, nopga sirkeno tjeng li shwoy. Eshko ga woshrara Sbörë iröng obi, ga beno löng nopga ichë Cristo tjok lu pjloglo sak dbäw dbäw (1,000).

⁵ Nopga woshrara Sbörë bäm go li epga. Llamo woshrara llëm, äär jong lu pjloglo sak dbäw dbäw (1,000) li pjitong guing. ⁶ Woshrara Sbörë bäm go li ber wopjlú, iak beno tjeng dboy Sbö kong bakoe. Nopga wolono tjeng li wolon jek obishko ga llëye wen ba kong llëm, ber löng syöshtaga Sbö kong, Cristo kong, ga nopga iche ba tjok lu pjloglo sak dbäw dbäw (1,000) bakoe.

Ä zanabae

⁷ Äär lu pjloglo sak dbäw dbäw (1,000) lishko ga Ä döra ba shdüžlong shtoyo jong li dwayo, ⁸ ga opshino to shäng oba jyäpgwë kjok kjwang jikong, töya ëngkjwë wlo. Tjëyoga jyäpgwara li ko Gog, Magog bakoe. Epga träk llëm, la sho tjeng dlung kjako

wleni. ⁹ Eshko ga tōno lōng kjok kjwang jīkong dwayo, ga Sbō nopga lōng li kjokyo kopjrina lok pjribrie. Kjok woyde Sbörē ara li eshko.* Gueniyo ga iök ichara Sbörē lon kjok dogo dwayo, ga epga pjira drete. ¹⁰ Eshko ga Ä, nopga jyāpgwaga li shara, dbura jer akkwo ko *azufre* pjē jong ri ri shtoyo li roy, ba pjeyoga äya owa li, ba dboryaga li, e dbura beno tjeng dēnashko lishko. Shto, e kēsbang, so dlung kjoyoe. Ga mya jīkong li shdūya ber lōng eshko shkē dba, ñyado wlo.

Nopga ilgweraba lōng p̄lu sökklo jong kjwara kēsbang, p̄lublún li bokshto

¹¹ Eshko ga ñn ga p̄lu sökklo jong kjwara kēsbang, p̄lublún, kjing go ēbo sök kjlara. Eshko ga kjok uunkong töktong ba bokshto dwayo, kjok dogo, klung bakoe. Beno ñgöy ame. ¹² Ga ñn ga nopga wolono tjeng kēs li lōng p̄lu sökklo jong li bok-shto, nopga tjwlo ara, nopga tjwlo chira bakoe. Eshko ga kjibokwo tjeng li roshwinaba. E irgo ga kjibokwo roshwinaba kjwara obi. Ēye ber sök sē ñyado Sbō tjok wlo ga ba ko, e tak pjang kjibokwo e go. Ga nopga wolono tjeng li ilgweraba, llēbo shäryara dö, tara beno tjeng kjibokwo tjeng kēs roshko li kjīshko. ¹³ Nopga wolono beno tjeng dlung roy ga lōng eshko. Nopga wolono beno tjeng sakshko ga lōng eshko. Nopga wolono beno tjeng shinmoga shtoyo ga lōng eshko. Ga kjlara kjlara ilgweraba, llēbo shäryara dö li kjīshko. ¹⁴⁻¹⁵ Ēye ber sök sē ñyado Sbō tjok wlo ga ba ko, e tak pjang Sbō kjibokwoyo li go. Gueniyo ēye ko wlēnaba tak

* **20:9** Kjok woyde Sbörē ara le li, e Jerusalén kjokyo loklo.

pjang e go llëm ga dburaba jer beno tjeng iök pjë jong ri ri shtoyo li roy, shinmoga shtoyo li tjök. Shto, e kësbang, so dlung kjoyoe. Nopga wolono tjeng li wolon jek obi wleni eshko.

21

Jerusalén kjokyo tjaglën

¹ E irgo ga ïn ga kjopkwo pjang tjaglën, klung buk tjaglën bakoe. Kjopkwo këguë li, klung këguë li, dlung këguë li, e jeno uunkong, llëbo këguë li beno ame. ² Ga ïn ga kjok ter pjang kjrina, Sbö sök kjok dogo lishko dwayo. Kjok li ko Jerusalén, e shäryak tjaglën, kjok iak beno buk dboy Sbö kong li e. Kjok li shäryak wolësowa, walë poshäryono orkwosmok dörö wlo wleni. ³ Eshko ga ybö kuror tek pjlu sökklo jong lishko dwayo pjlara, tjlä ga «Sbö ber sök nopga löng lishko shara. E ber sök ba tjok, ga epga ber ba nopga. Sbö om go li ber sök ba tjok, ga ber ba Sbö. ⁴ Ba boryo kröya Sbörë, ber löng slar ame wlo. Eshko ga llëbo këguë li pjitong kjishko ga ëye wolon ame, slar ame, poglo bang ame bakoe» le.

⁵ Eshko ga sök pjlu sökklo kjing go li tjlä bor kong ga «llëbo kës shäryër shäng ëre tjaglën eröe. Tjlökwo loror li, e bek, nopga mär ba go ga pjluë. E kjishko ga tozong. ⁶ ¡Uunkong li shäryono pjire! Tja so tjläkwö toklo ko *Alfa** kjoyo, tja so tjläkwö toklo ko *Omega*† kjoyo bakoe. Sök bäm go li tja. Pjirshko ga ber sök li tja bakoe. Di ichër tur di bokkwo roy dwayo, ëye omiono ga ber sök së iyado bor tjok. Ëye

* **21:6** Grecia so tjläkwö go ga tjläkwö toklo ko Alfa, e ba bäm iyö, A wleni. † **21:6** Grecia so tjläkwö go ga tjläkwö toklo ko Omega, e ba pjirshko, Z wleni.

di ère ië woydë ga kong twër, ga tjwlõ shir llëme. ⁷ Eye llëbo owa li zano ga llëbo kës ère ber ba kong, ga tja ber ba Sbö, e ber bor wa bakoe.

⁸ »Gueniyo nopga kjok bangkjrë wleniyo, nopga mär bor go llëm wleniyo, nopga llëbo shäryako llëm li shäryë wleniyo, nopga oblë zrök wleniyo, nopga pë no orkwosmono ba tjok llëm li tjok wleniyo, nopga parkë ybi wleniyo, nopga llëbo jyäglo poshrëk wleniyo, nopga lürkë ä wleniyo, era dbukoba jer ber löng akkwo ko *azufre* pjë jong ri ri shtoyo li roshko. Shto e kësbang, so dlung kjoyoe. Nopga wolono tjeng li wolon jek obi wleni eshko» le.

⁹ Eshko ga Sbö parkagaga kjok dogo so doglo kjäk (7), wloshko tjeng di ioklo, roshko no shdunglo tjeng kjringswo kjäk (7) kjlara li tek shrono shäng bor zlong, ga tjlä bor kong ga «Pja tek bor tjok, ga walë orkwosmok Öng Wlëp Ushko So Llgwoklë tjok wlo li pin bop kong» le. ¹⁰ Eshko ga tja go Sbö Sëya jlökoyo, ga tja söra parkaga lirë jem dlup jong kësbang, kjókshko li kjing go. Eshko ga kjok pina bor kong kjrina, ter pjang Sbö sök kjok dogo lishko dwayo. Kjok li ko Jerusalén. Kjok iak beno buk dboy Sbö kong li e. ¹¹ Sbö sök eshko kjishko ga kjok li kälä bolo ara, so akkwo wolësowa tjwlõ ara wleniyo kälä kjoyo, so akkwo ko *jaspe* kälä kjoyo, roïgöy wëllë, so batlë sho kjoyoe. ¹²⁻¹³ Kjeryo shäryak pjribri kjókshko, kjër li shklukyo kjringswo pkëng (4), ga kjër li pjlor kar kar, u bäng bäng lok kjwo mya mya, uunkong ga kjwo sak kjwara kjingsho pjök (12). U bäng bäng daga Sbö parkaga kjok dogo sorë kjlara kjlarae. U

bäng bäng kjwara kjwara li go Israel tjëyoga doglo sak kjwara kjingsho pjök (12) li ko jyã tjang pjang kjrina kjrina eshko. ¹⁴ Kjok li shakklo kjwo sak kjwara kjingsho pjök (12), kjwara kjwara li go Sbö tjlökwo roy laga Jesús äska doglo sak kjwara kjingsho pjök (12) li ko jyã tak pjang kjrina kjrina eshko.

¹⁵ Parkaga lan shäng bor tjok li, wloshko llëbo tjlïkklo shäryak dbur sho shöylör go tjeng kjwangna, kjok li, u bäng bäng li, kjër li, e tjlïya e go wlo. ¹⁶ Kjok li tjlïy ga pjlor kar kar bam beke. Ga tjlïna llëbo tjlïkklo li go ga beno kësbang anmoyö. Shji jëk shkluk kjrina dwayo äär shkluk kalëkong wlo ga woyde ga shji jëk dbargwo sak kjäk kjingsho shkëng (75) wleni dik.† Ga jem kjomo lëkong ga wop eni bakoe. ¹⁷ Kjër li tjlïna, llëbo tjlïna norë wleni ga shtëgro orkwo jyägloŠ pjloglo sak dbäw kjingsho sak pkëng kjingsho pkëng (144). ¹⁸ Kjër li shäryak akkwo ko *jaspe* go. Kjok li shäryak dbur sho shöylör go, ga roïgöy wëlä, so batlä sho kjoyoe. ¹⁹ Kjok li shakklo shäryak lok akkwo wolësowa tjwlö ara wleniyo oblë oblë go. Ba shakklo bäm li shäryak akkwo ko *jaspe* go. Irgo shakklo shäryak akkwo ko *zafiro* go. Irgo shakklo shäryak akkwo ko *ágata* go. Irgo shakklo shäryak akkwo ko *esmeralda* go. ²⁰ Irgo shakklo shäryak akkwo ko *ónice* go. Irgo shakklo shäryak akkwo ko *cornalina* go. Irgo shakklo shäryak akkwo ko

† **21:16** Shji jëk dbargwo sak kjäk kjingsho shkëng (75) wleni dik le li, e kilómetro kjringswo sak dbäw dbäw pjloglo pjök kjingsho sak dbäw pjloglo pjök (2,200) loklo. § **21:17** Orkwo jyäglo pjlara, e centímetro sak pkëng kjingsho shkëng (45) dik.

crisolito go. Irgo shakklo shäryak akkwo ko *berilo* go. Irgo shakklo shäryak akkwo ko *topacio* go. Irgo shakklo shäryak akkwo ko *crisopraso* go. Irgo shakklo shäryak akkwo ko *jacinto* go. Irgo shakklo shäryak akkwo ko *amatista* go. ²¹ U bäng bäng kjwo sak kjwara kjingsho pjök (12) li kjwarashko kjwarashko shäryak akkwo kjwara kjwara go. Akkwo li wolësowa tjwlõ ara wleniyo ko *perla*. Irbo kësbang jek buk kjok roshko li shäryak dbur sho shöylör go, roïgöy wëlä, so batlä sho kjoyoe.

²² Tjlapga Sbö, llëye shärye woydë li shärye ga pjlúe. Kjok eshko ga ba u, e poshrékoba eshko wlo ñnor llëm, sök om go eshko kjïshko, Öng Wlëp Ushko So Llgwoklë li sök eshko kjïshko bakoe. ²³ Kjok eshko ga dlo kãlä shjiy li, mok kãlä shjiy li, e woyde llëme. Kjok li ber shjiy, Sbö dbo kãlä shjiy li go, Öng li dbo kãlä shjiy li go bakoe. ²⁴ Ga tjëyoga oblë oblë löng kjok ëre kjing go li jëk löng iök shjiy li go, ga ba pjluyoga, ba llëbo tjwlõ ara li tek söya, ie lok ber eshko wlo. ²⁵ Dba ga kjok eshko li u bäng bäng lok oojong ñyado, ga eshko ga shkë dret, kjok shjiy ñyado. ²⁶ Tjëyoga oblë oblë, ba llëbo tjwlõ ara li tek söya, ie lok ber eshko wlo. ²⁷ Ga llëye ber Sbö bokshto ga ä li, e äär eshko llëm, ëye wotjlik owa wleniyo llëm, ëye jyörkë ä wleniyo llëm bakoe. Nopga ko tak lok Öng li kjibokwoyo go li, epga äär eshko eröe. Æye ber sök së ñyado Sbö tjok wlo ga ba ko, e tak pjang kjibokwo ëre go.

22

Di pjang pjlara, di li, shji ie ber löng së ñyado

¹ E irgo ga Sbö parkaga kjok dogo so li, tja kong di pina pjlara, di li ioroy ga shji ber löng sē ÿyado Sbö tjok. Di li tur ter Sbö, Öng Wlêp Ushko So Ilgwoklê, e löng lishko dwayo, ² ga jer buk irbo kësbang jek buk kjok roshko li tjrêko. Di pjang li kjwo kar kar, kjor jong kjlara, ba bo uoroy ga shji wolon llême. Lu pjlobi go ga kjor li botjyë pjloglo sak kjwara kjingsho pjök (12), mok kjlarashko kjlarashko botjyë ÿyado. KJOR li korga, e tjëyoga oblê oblê li dwlomnekklo.

³ Eshko ga ëye ie Sbörë ber shdungko ame. Sbö sök eshko, Öng li sök eshko bakoe. Ga poshrëya ba parkagaga löng lirë ÿyado. ⁴ Sbö bokkwo ÿya lok om go, ga Sbö ko li tak pjang uunkong li bokdo go. ⁵ Eshko ga shkë drete. Iök shjiy woyde lok llëm, dlo woyde lok llëm bakoe. KJOK shjiy laga ber Sbörë om go. Ga ber löng nopga ichaga ÿyado.

Jesús tjwe maling iröng obi

⁶ Eshko ga Sbö parkaga li tjlê bor kong ga «Tjläkwo loror li, e bek, nopga mär ba go ga pjlúe. Dënashko ga Sbö tjlêno ba tjläkwo lagaga kong om go. Ga ba parkaga ëre ichara, llêbo wen dörö li pin ba parkagaga löng li kong wlo» le.

⁷ Eshko ga Jesús tjlê bor kong ga «¡Tja kuzong! Tja tjwe maling iröng obi. Èye tjläkwo tak pjang kjibokwo ëre go li kolë ga era ber wopjlúe» le.

Kjibokwo pjirzlong

⁸ Tja Juan, llêbo uunkong ëre ñnor, kuror tjarë om go. Llêbo uunkong ëre ñnor, kuror pjir ga tja kjök tono Sbö parkaga li bokshto, ga poshrër loror.

⁹ Gueniyo tjlë bor kong ga «¡Kjwe shäryëp llëme! ¡Tja parkaga Sbö kong eröe! ¡Pja, bop pjeyoga Sbö tjlökwo laga 'li, bop pjeyoga kjibokwo ëre kolaga 'li, pjây eni bakoe! ¡Sbö poshrëpdë dey!» le.

¹⁰ Eshko ga tjlë bor kong ga «Tjlökwo tak pjang kjibokwo ëre go 'li dbaryo äätoe. E kjïshko ga tjlökwo li jnep ber lûtshko llëme. ¹¹ Ëye löng llëbo owa shäryë ga owa 'li shärye eni jek këgong; ëye löng llëbo shäryako llëm 'li shäryë ga owa 'li shärye eni jek këgong; ëye löng llëbo pjlú shäryë ga pjlú 'li shärye eni jek këgong; ëye iak beno tjeng dboy Sbö kong ga ber eni jek këgong bakoe» le.

¹² Eshko ga Jesús tjlë bor kong ga «¡Tja kuzong! Tja tjwe maling iröng obi. Bor nopga potjwllëkklo tek sör bor tjok, ga kjlara kjlara li potjwllën eshko, llëbo shäryara dö 'li kjïshko. ¹³ Tja so tjlökwo toklo ko *Alfa** kjoyo, tja so tjlökwo toklo ko *Omega*† kjoyo bakoe. Sök bäm go li tja. Pjirshko ga ber sök 'li tja bakoe.

¹⁴ »Kjok tjaglën lishko ga kjor jong kjlara, ba bo uoroy ga shji wolon llëme. Ëye shwong kwoshkwono beno drëpdre wleni ga ie Sböre ber wopjlú, kong dbo twe opzrëk kjok eshko wlo, kjor bo 'li ue wlo bakoe. ¹⁵ Gueniyo nopga owa 'lira ber löng kjoko. Nopga parkë ybi wleniyo, nopga pë no orkwosmono ba tjok llëm 'li tjok wleniyo, nopga oblë zrök wleniyo, nopga llëbo jyäglo poshrëk wleniyo, nopga lürkë ä wleniyo, epga ber löng kjoko erä.

* **22:13** Grecia so tjlökwo go ga tjlökwo toklo ko Alfa, e ba bäm 'yo, A wleni. † **22:13** Grecia so tjlökwo go ga tjlökwo toklo ko Omega, e ba pjirshko, Z wleni.

¹⁶ »Tja Jesús, bor parkaga kjok dogo so ichoror, tjłkwo ěre lě bop kong wlo, roy shdöp bor tjłkwo kjaragaga lōng kěs li kong wlo. David tjĕyo tjwłō arayo li tja. Dbala ko Dbar Kajoklo li kǎĩā bolo ara, tja so e kjoyoe» le.

¹⁷ Sbō Sĕya, Öng boy, e tjłĕ ba kong ga «¡Pja tegö!» le.

Ĕye omkuno ga tjłĕ ba kong ga «¡Pja tegö!» le.

Di buk pjlara, di ioroy ga shji wolon llĕme. Ĕye wodogro wleni ga tjwe di li iĕ ga pjlú, ga tjwłō shiya ěrĕ llĕme.

¹⁸ Ĕye tjłkwo tak pjang kjibokwo ěre kuk ga kong llĕbo lĕr wĕlĕ, miyde lok wlo. Tja tjłĕ ba kong ga «Ĕye kjibokwo ěre kjingsho tjłkwo iono obi ga llĕbo owa wen nopga owa kong tak lok kjibokwo ěre go li kjingsho ie Sbörĕ obi ba kong bakoe. ¹⁹ Tjłkwo tak pjang kjibokwo ěre go kjrina, tjłĕ ga kjor jong kjlara Sbō kjokshko, ba bo uoroy ga shji wolono llĕme le eni. Ĕye kjibokwo ěre tjłkwo lōno kwara dō ěmdĕ ga kong dbo twe Sbörĕ, kjor bo li ue wlo llĕme» lĕr ba kong eni.

²⁰ Tjłkwo ěre laga tjłĕ ga «Ĕng, tja tjwe maling irōng obi» le.

Ber eni, Tjlapga Jesús. Pja tegö.

²¹ Rokĕr Tjlapga Jesús kong ga ba wopjlú li kjishko ga Sbō nopga kjimte ara. Ber eni.

**Sbö Tjłõ^{kwo}
New Testament and Shorter Old Testament in Teribe
(PM:tfr:Teribe)**

copyright © 2008 Wycliffe Bible Translators, Inc.

Language: Teribe

Translation by: Wycliffe Bible Translators, Inc.

Teribe [tfr], Panama

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Teribe

© 2008, 2007, Wycliffe Bible Translators, Inc.
All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

539cf8e3-01bf-5f34-8833-610f18367f8c